

TANGSA NAGA Heart Book
Cell phone format

THE HEART OF MAN



COPYRIGHT

ISBN 978 - 1 - 920322 - 90 - 8

E-MAIL: info@angp.co.za

ALL NATIONS GOSPEL PUBLISHERS
Posbus 2191, PRETORIA, 0001, R.S.A.

(A Gospel Literature Mission financed by donations)
(Reg. No. 1961/001798/08)

MAIQSE TSANTSII

RIIMAKLA

WENYI TSANTSII CHAMNI

(Shiiton Sumla Manphan Roqshi)

Ara lakdapse arka Phrans mung na rawii 1732 na atiidongpha. Kra Aphrika mung na mission jaqsham na lang miitu Rev. J.R. Gschwend raq rawii 1929 na tru waiq nongto. Kiimaq kra jai miishe kle nongto, raüta kra kopy arang na All Nations Gospel Publishers raq maiqphan bom thun 250 miishe kleto. Raüta tsangshiq raq ümchaü na saüli maiq mung 127 na pheakuqtlo. Maiq phan wiita bom na, ajong aran phan wiita ma kiimaq phanrap shiikea (dhorom) lamphanti ka ara lakdapse ariiraq Shiikeawe tengteng tsütsa tsäühea sitlaq kra sum teiwantlo. Arka shammiwe Ejekiel raq Khristo misäühoshaq na rawii 586 mishaq na akha ngutaq, "Ngi raq namshiq ma tsantsii anye she mikuqha kiimaq khutsai min anye she mikuqha... Namshiq ka isengi ma mijahan Ngi ka namshiq Shiikeawe miraq," (Eje 36:26-28) kriishe sap wantlo.

MAIQSE TSANTSII

SHIIKEAWE NOQKIJAM RIIMAKLA THAWE

MINSHIIQ CHANG KHOK (1 Jhn 3:4-10)

Ümniiraq ara lakdapse ara phat tlaü na, arka chamni ashi na ümsham liitlaü ikha nguta ümstsan na tiimashat maq phat laq. Ümniika Phungmaiqse riikaü lo, jurwa Khristo ma kammak riimakla kamasham na achhan riiwanti miraq, kra nguraü min ümniiraq ümstantsii ka Shiikeawe raq jamkho chhitlaq kiikha maiqmii raq michhi haü. "Ngi riika maiqse raq shintlaq kiikha shin mang. Maiqse riika maiq ka asham ari na liitlo. Shatmaq ngi riika atsantsii na liitiikang" (1 Sa 16:7). Shiikeawe raq nashiq ka nashiq jamkho sitiikai kiikha liitlo.

Thawe (Soitan) ka arot chongti ma akaü awejong. Apaiq ka ranyaq hokham se. Kiimaq ara mangjong hiq arma phrakaü. Apaiq ka rawulam rase ikha tiimiikhiiq raüta maiq jechakre maiqwere ka lamjiq nü na shunsheahotlo. Ümchaü pat niimin, man na richü pat na ikha, maiq arot kiimwebi pahea asi. Tsangshiq ka Khristo kiimwebi jatiikai nguta tiibaingetlo. Arka awang rai chang jam min ahü. Jamkhano ngukla Thawe (Soitan) apaiq kli rawulam rase ikha tiibaingetlo (2 Ko 11:1314).

Thawe ka ara mangjong hiq phrakaü raq, maiqse ka ranyaq mong na thütlo. Kra ningkhan Shiikeawe raq tsangshiq lungwiitlaq kra chhiphaq mak sitlo. Riimakla Jesuq ka tsangshiq tiichhii wan miitu tsaito nguta sapmak sitlo (2 Ko 4:4). Ngarai maiqse tlotli kiimaq juwa kammakti thun tlotli ka wenyi na amaa sitlo. Kiimaq Shiikeawe sapmak makchuk. Tsangshiq ka ara mangjong hiq na siti abi thawe wokhong na sitlo (Eph 2:1-2). Tsangshiq mak ka phanshi ra laa maq jiimin tiipiiqkehü miika, tsangshiq ka amokaiwi she miqtoshe pattup pat-sa athen wan lam na kihotlo ngutiika sapmak. Maiq jurwa, "Ngi ka jangshi min ngarai tang mang we" nguta tiingotlaq, kriiwe ka maiqmii kli tlaophaqtlo.

Jamkhano ngukla, "Shiikeawe Se saükitaq arka, ara chongtiikai thawe raq ngarai jaqsham miitu mintin ningkun tu rüm tlaq, kra arang chong maq babaiq kai kito" (1 Jhn 3:8). "Arningkhan, namshiq ka Shiikeawe wokhong na sanglili maq, ahea wiq maq si ronglaq. Lanta Shiikeawe wokhong maq thawe ka, along lanta jobaiq ronglaq. Kra riihan jiika, apaiq ka namshiq tho wa aju she mirho. Arkha maq, namshiq ka Shiikeawe wokhong na nyap wan tlo ronglaq.

Raüla apaiq raq namshiq ka awokhong na mitiisi” (Jak 4:7-8).

Ümniiraq ara lakdap ara phattlaü krai mren kiimaq arwa sumla thun kra shri ra tiitsang liittlaü na, ümniiraq ümtsantsii sumla kra michhihäü. Shiikeawe wanii raq tiichhikuqtlag kra ümtsantsii rong arai jamkho sitlaq kra ümniiraq michhihäü. Ümngarai phong ka as idea nguta tiingotlo. Kiimaq kra ngarai thun ka ahü nguta naqkhiikiq. Jamkhano ngukla Shiikeawe bomtsi na akha chongtlo, “Nashiq raq nashiq ngarai ahü nguta tiingohai jiila, nashiq raq maiqmii kli mitlaophaq rong i. Kiimaq nashiq tiingo tiikai ka tengmak. Shatmaq nashiq raq nashiq ngarai thun ka Shiikeawe man na atiidii riihaila, apaiq raq nashiq ngarai thun ka adii mirkuq. Raüta nashiq ka nashiq ashut jaqsham tiikai kriiwa atiisii mirkuq” (1 Jhn 1:1-10). “Jesug tiijai raq nashiq ka phanrap ngarai wa tiisii hekuq tlo.”

Ümniika Thawe wokhong na sitlaü, riimkla Shiikeawe wokhong na sitlaü. Ümniika ngarai dise riimakla Shiikeawe jaqshise. Ngarai raq ümrilung ka pengtlaq jiila, kriika ahü nguta naq tiidam paükiq. Shatmaq Shiikeawe man na aho anyi riilaq. Apaiq raq ümniika Jesup Khristo pum

lūmaq mitiichhiikuq. Apaiq ka ara mangjong hiq na ngarai maiqsetiim chhiikai kito Thawe ningkung nashiq dü na sitlaq kra tiibunbaiqkai kito. Apaiq ka nashiq Chhiiti. Ümniika asii Shiikeawe raq wiita apaü raüta athü thun kra saptiwe man na sitläü. Apaü riilaüta thütlaü ümtiima tsantsii thun kra kiimaq ümrilung na phanrap klotlaü thun kra saptiwe. Shiikeawe maklii wa ümkhum kra kiimaq ümjaqsham thun kriika ümkhiiriitimin paülot maü. Jamkhano ngukla, "Shiikeawe raq nashiq nilok ka phangsangto. Apaiq raq taimak shea miraq? Apaiq raq nashiq makpo phangsangto. Apaiq raq chhimak shea miraq?" (Sho 94:9). "Tatiwe raq mangjong tlotli ka tro tri raüta kheshat liitlo. Raüta ju tsantsii wa apaiq rai tiipum wantlii maq sitlaq kriiti ma ningkun shoqke miitu khekham sitlo" (2 Ka 16:9).


"Apaiq raq maiqse kiimwiiq aweatek ka liishat riitlo. Shiikeawe makki wa ngarai maiqse tiipaü kai chang ka ranyaq pinthum nguraü min tiipaü lot mak" (Job 34:21-22).

"Shatmaq, Jesuq riika tsangshiq ma kam mak riito. Jamkhano ngukla, apaiq riika tsangshiq tsantsii ka kunli asap" (Jhn 2:24).

Arningkhan na, "Peohea she ngarai thun diikejete ma, ashut mra thun diikejete ma. Peohea she Tatiwe raq shut laü nguta kha nyan makti ma, kiimaq tlotli laopha kharü wa wase jawanti ma" (Sho 32:1-2).

Copyright ANGP

1. NGARAI MAIQSE TSANTSII




Ara sumla niika maiqse mungkang hanngam tsii
rümti, ngarai maiqse maiqwe lo jechaklo kra tsii
Asii Lakdap na ngarai maiqse nguta chongtlaq
kra riito. Kra ngonang ka juwa ara abi

mangjong hiq tsantsii ramho raq jamshatlaq kriiti ka ngutlo. Kiimaq joli hanngam ramho kharü raq khatlaq kiimaq maiqse hanngam ramho raq jamshatlaqti kra chongtlo. Ahata riikhaqli Shiikeawe raq chhitlaq tsantsii sumla. Amak ka khang mak, makshii jaqshii tiichhitlaq kriika chechok tsampiiti (Tak 23:29-33) na chongtlaq kra chongtlo. Kijjaq chongtlo, "Agam agu siti ka juwa? Ahan anyi siti ka juwa? Tatso wiinyi siti ka juwa? Abot atsaü wali ka juwa? Akhum na ami atsi tamli ka juwa? Makshii jaqshii siti ka juwa? Kriika rawa minru, chebak nyangti, chenye nyang wan ruqti riito. Chekok shiiroro kra chhilaüta, kok na achhai lüplüp kra chhi laüta, kra nyang raüla rot na, nyeajokjok hea asum wiq, kra tei laüta, ümniika che ma naq tlaokiq. Anap ranap niika, paü raq athaü ikha, atsi she mirhaü. Ümmak na phan phan mitiijiki, ümτσιimin tsang mak miraq; bom min samhea bomtsü maü miraq."

Ara sumla na khupo takiq na, maiqse tsan mong niika phanrap phanrii ngam angiq kong pahea asi tiichhitlo. Kra sumla thun kriika maiqse tsan mong na phanrap phanrii ngarai phong sitlaq kra chongtlo. Maiqse tsan mong ka anyungchong kiimaq ngarai phong kra tai tho raüta tiijonglu

chang ba. Shiikeawe raq nashiq ma chongtlo, apaiq shammiwe Jeremia nübok maq, "Maiqse tsantsii ka juro mikhon lot? Atinkhan laopha pinthum ka ahü; Arka ahealot chang riimak tsihea" (Jer 17:9).

Arka Jesuq apaiq riimin tengtodea nguta akha chongtlo, "Maiqse tsan mong wa dong tlaq kra raq, maiqse tsantsii tiishe shitlo. Maiqse tsan mong na sethoq ja, abi tiima, ahuk ja, maiqtsea maiqta tiima, maiqchak rai sra, sükha tsii, kiimaq ahin abi tiima tsantsii rümtlaq thun kra; lapha tsii, raweahü hon aja, makshu rashe tsii, maiq chongsea, ashkong tsii, kiimaq ngila sang jasha rong arai siwan tlaq kra; arthun chong kai abi hon atsii ahata, maiqse tsan mong wa adong. Kiimaq maiqse tsan mong wa, arthun tiima tsantsii dong tlaq, ara raq tiina, apaiq tsan tsii ka tiishe shitlaq" (Mak 7:20-23).



1. WUDONG SUMLA : Wudong shamhea ka wiitarü raq shomratlo. Shatmaq arjaq maiqse tsan mong na wudong sumla kriika, ashkong ngarai kra chongtlo. Lusiphar ka akhing ashi na Shiikeawe raq akhek atiitsang rase nguta ashong. Apaiq ka rawü rase nguta sito. Apaiq ka ajong ngacho na atiinga wa, apaiq ashkong khana ajo riibaiqto. Kiimaq apaiq ka Shiikeawe rai wesang miishe jakito. Raüta apaiq ka thawe miishe jakito (Isa 14:9-17; Eje 28:12-17).

Ashkong tsii ka wamungtan nyungchong kriiwa saütlo. Raüta apaiq ka phan phan lamlu na tiichhitlo. Maiq wiijam ka tsangshiq chiithetsi ma shiikongtlo. Kiimaq tsangshiq ka lak apa atsinhai nguta shiikongtlo. Kiimaq athuk atsom miirii sam raüta tsangshiq khum ka maiqjea asi rash ra tiichhitlo. Kiimaq wan rang wiira laktum thun kra lak raüta, jaqsin thun kra pa raüta, jaqtop thun kra pa raüta tiitsam kamtlo. Arka Isia lakdap 3:16-24 na chongtlaq ikha shiikongtlo. Maiq wiijamti ka tsangtitiim mang, tsang mung mang, tsangshiq thung alai, atiitsaba atochang thun, kra chong raüta tiitsakitlo. Tsangshiq raq "Shiikeawe raq angiim boqshatti ka athu riibaiqto" (1 Pe 5:5). "Shiikeawe raq ashkong tsii nai maiqmii kiidea

ajong nguta tiimati ka asaisi riitlo” (Tak 8:13).
“Shiikong tsantsii ka atsai lam sheati, khünga maklii ka adea wa chang thiikho theti” (Tak 16:18) nguta chongtlaq kra alaq riibaiqtlo.



2. **CHHECHHI SUMLA** : Chhechhi sumla ka hanngam ramho thun, sethoq ja ramho, maiqchak rai sra, kra chongtlo. Arjaq chongtlaq ngarai thun arka ümchaü pat na henghea she heng wanto. Shatmaq arka phangthum wan akhing she dea nguta nashiq raq sap wan chang sitlo. Arka Jesuq raq rawii 2000 mishaq na achonhthü kriishe dea kurai wanto nguta nashiq raq sap wan tiikai. Athum wan akhing na Sodom nai Gomora hiq na jamkho sitaq kiikha miraq nguta chongto. Ara ngarai bu raq maiq ka jechakre kiimaq maiqwere thun wiita jamsha wanto. Kriili min riimak, kamasham kechu maiqse jamkun kriimin wiita she nyam wanto. Kiimaq skul thun nai hostel thun min wiita she

nyam wanto. Shatmaq ara ashut jaqsham arka ajeasi nguta ahü maq maiqse tsan mong na sinema lümaq, theater lümaq, naiqhü ma sumla thun ka lakdap thun na waiq raüta tiinyam wanto. Kiimaq lai hin pahea lam lu maq arthun arma tiinyam wantlo. Shiikeawe raq arthun arka ngarai nguta liitlo. Shatmaq ümchaü pat wa maiqse riika arka ahea akhiidongdii nguta tiinyeabaiqtlo. Jetu jerobi ahing amun raq arka riikhaqli rilung lam nguta tiimatlo. Arthun ara sinema wa, kiimaq lakdap wa phat raüta, kiimaq lai hin lam lu pahea maq, nyam wantlo. Arthun arka Shiikeawe raq ngarai thun nguta liitlo. Shatmaq atiisup na tsangshiq maiqmii kli thiikho bok na dea wantlo. Raüta jeasi ngaütlo kiimaq tiishudaqtlo. Sethoq jasha na riinyat riishat rilung, sinema na wiinumtibi thun ka jetu jerobi raq srea nolabi dea nguta liitlo. Awiinum chang khok thun, kriimin akhiinok sethoq jasha chang ba ma jatlo. Shiikeawe srea Joseph (Rap 39) na chongtlaq kra kiimaq ahinti thun rilung ka riikhaqli dea nguta tsangshiq rilung lam phanti maiq ka ahüshe. Julunok thatsang maiqse phan riimin jechak maiqrai srati ka lo maiqwe maiqchak rai srati ka atsea riibaiqtlo. Krai mren phangthum khapho ranaiq na tsangshiq ka rung na chap raüta nashiq pha qchi pat

maiqsetiim ma tsii tiichhike kiimaq nashiq tiishut wan michap wan. Shiikeawe raq nashiq ma sethoq ngarai rai naq tiitsa rongkiq nguta chongtlo. "Maiqse raq ahin ngarai tangtlaq kra riika akhum na kopwa mak. Shatmaq jurwa sethoq ngarai tangtlaq, kriiti riika apaiq maiqmii khum ka shiithen baiqtlo. Namshiq raq namkhum ka Shiikeawe raq namshiq ma akuq Asii Wenyi kra sichang jam ngo sap man shea? Asii Wenyi ka namshiq khum na sitlo. Namshiq khum ka namshiq rii riimak she. Shiikeawe rii she" (1 Ko 6:18-19). "Riita arkha maq jurwa maqimii khum Shiikeawe sichang shomjam kra shiithen baiqtlaq, Shiikeawe raq apaiq ka mishthenbaiq. Arka jamkhano chongtiikai ngukla Shiikeawe shomnoq wan chang shomjam ka asii. Kiimaq namshiq khum ka Shiikeawe shomjam" (1 Ko 3:17).



3. **WAQ SUMLA** : waq sumla riika cheropja nai shakaq tsii kra chongtlo. Arka nysamse ashe phan amakki na jamlai wa chhitlaq kra bakphaq wan ruqli, asii nai ashe ka ngumak phaqsigtlo. Akhiisii hali ngarai tsantsii riika ashe sheachong beaching bomtsi ka phaqsiiq wan ruqli. Kiimaq maklii na, sumla na, lakdap na ümchuwa akhiinok chhitlaq kra phaqsiiq wan ruqli riitlo. Maiqse khum kriika atra Shiikeawe si miitu shomjam ahai. Arka abi ati phaqsiiq raüta, kiimaq ashe rong arai maq, ngishup nyang ngu I, riimakla soka phaqsiiq raüta, keani nyang raüta, kiimaq khum then chang tsiq po thun kra phaqsiiq raüta tiisheshi baiqtlo. Ngi shup nyang ja raq nai keani ja raq maiqwere thun ka pahea achong lot mai she ümtiikiimin chhimai wa kharü maq kha wanto. Shiikeawe ningkun miili akha ümkoq ümphaq abi rong arai disekong ka wase ma mitiija wan lot. Kamasham maiqse nguta tiimatlaq maiq apako riika noqku jam mong miika ngishup ka nyang kham mak. Kriika Shiikeawe shummi ma mijaki. Shatmaq tsangshiq kriimin Shiikeawe noqku jam kriika akhiinok maiq nyiqti sang arma tiisheshi baiq miika khaiqkham mak she. Akha tsangshiq khum Shiikeawe shomjam kra tiishetlo. "Namshiq raq asaphan" nguta kiimwe Paul raq ngutlo, "Namshiq ka Shiikeawe

shomjam, Shiikeawe Wenyi ka namshiq khum na sitlo. Kra ningkhan jurwa Shiikeawe shomjam ka tiithenbaiqtlag, Shiikeawe raq apaiq ka mitiithenbaiq,” (1 Ko 3:16-17; 1 Ko 6:18-19).

Shakaq maiqse ka maiqsai asi. Riimakla Shiikeawe makki na thiihü. Nashiq raq phaqsiquitiikai kriika atra si miitu phaqsiquitiikai. Nashiq atra sitiikai ka aphaqsea miitu ka riimak. Ramtsi ka tü adung aheawiq phan kra phaqsiquitiikai laita wok ka tiiphe chang. Shatmaq sükha tsii ka wranaiqshe “kuqlaq! Kuqlaq!” nguta hoqsii ruqli hoqsii tlo.

Sükha tsii ka awok ümtiikiimin phemak phan. Ümtiikiimin awok ka ma mak phan. Tongshong Chü Thungtri maq, shakaqti nai cheropti ka long maq tiiqbaiq raüta tsatbaiqtlo” (Tri 21:18-21).

“Chechok tsampiiti nai shakaqti raq miitsan mitum. Ranaiq rawa che nyang dungsea ngaseati ka, miitsantum raüta kheahü misi” (Tak 23:21).

Tsan na tiitsang laq maiq weshi chiithewe, apaiq ka shakaq kiimaq apaiq ka sükha ramho diwe riito. Apaiq ka tsaikito. Raüta wamungtan na dea wan raüta pinthum chamchaotlo. Cherop ja ka abi pinthum nguta kriika achong kesa chang min asi shea. Arka abi dea nguta shili shaqlaq chiiphü phü se maq liichang ka riimak.

Shiikeawe raq apaiq bomtsi na khangri ri hea chongtlo, cheropti ka Shiikeawe mungtan na saülot mak. Bear ka dung riimak. Arka che tiina. Bear raq maiqse tsii tiiphentlo kiimaq khutsai tiibitlo. Krai mren bear nyangti ka angok angiwe ikha jaq shamtlo. Tsangshiq ka sethoq sepii ma jawantlo. Kiimaq weshi raq weshi ka tsattlo, raüta matwe ma jakitlo. Che nyang mak ngu raü ka kiikha matwe miika jamak chang wa. "Chechok tsampii jati ka, maiqjiq angi nola; cherop jati ka maiqjiq" (Tak 20:1).

Jurwa che henghea klotlaq, raüta shatlaq kriiti kiimin Shiikeawe maklii niika ashut sii. Jamkhano ngukla Shiikeawe raq akha ngutlo, "Namshiq ka miqlan she! Chekhap nolabi lei! Laohu longkhang ka riishot lantea baknyang lam miika nolabi haihü songhü kata!" (Isa 5:22).

"Phiiptsi chang jo ümniima! ümniiraq ümmung tro na siti, maiqmung thun ka ümtsan khiq tsi ma, ji maq nishishi haihü wan laü. Laüta tiijea miisi shummi wan laü. Cherop kong ikha tiija wan laüta, jea tiingaü wan laü!" (Hab 2:15).

"Namshiq wiitarü raq ashut aphit maiqse ka Shiikeawe sengi ma jawan lot mak nguta chongtlaq kra asap han ahiq na. Namshiq raq maiqmii kli naq tlaophaq rongkiq. Maiq ümriiti

riiwa sethoq jatlaq lo, sumla shomnoq tlaq lo, maiqchak maiqse rai kiicham tlaq lo, maiqwe nai maiqwe liipan na lo, jechak nai jechak liipan na lo, hi awaq ikha hai nga tlaq lo, jurwa ahuk arot ma ja tlaq lo, juwa shakaq ma ja tlaq lo, juwa cherop ma jatlaq lo, jurwa maiq chongsiq tlaq lo, jurwa alao riitlaq ara chongtiikai akhnok maiqse ka Shiikeawe sengi ma jalot mak" (1 Ko 6:9-10).

Nashiq hanngam ngarai phong ka atiimochiikai chang riimak. Kra chongtiikai thun wa wiijam ka arthun ara: "Maiqse ngarai han-ngam raq, jamlai jaq wa sham tlaq, kriika archong sea rai ngori sha. Ra na tiweshat. Sethoq sepii jasha, ashe ashi riinyat shat, kiimaq hihai waqhai maq singa tlaq, arthun ahata ngarai han-ngam jaqsham. Kiimaq, sumla noqpi wan, nai maiqwug maiqlong jaqsham. Kiimaq, maiqse nai naiqse liipan na, wesang ralii ma riija wan. Raüta, riilong riiliiq miili siwan. Tsangshiq ka riishu riilii, akhiq abi, ngi nguli tiima tsii rüm tlaq thun kra. Tsangshiq liipan na, maiqmii wela jawan rang rang tsii, rümtlaq kra. Kiimaq, riitsea riitsiiq hon atsii kra. Tsangshiq ka makshu rashe miili sitlo. Kiimaq tsangshiq raq, phra sumla shomnoq tlaq poi akhing na, pinthum

chephe tsampii raüta, kuku waqshii kong ikha, riinyat shat raüta sitlo. Kiimaq, ara chong wankai thun ara niq riri hali, ahin abi pahea jaqsham thun min asi, kra sham tlo. Ngi raq namshiq ma, man niimin tsii chongkuq kang. Kiimaq ümchaü min chongkup nong tiikang. Jurwa arthun ngarai ara tang raüta sitlaq, kriiti ka, Shiikeawe sengi ma jawan lot mak. Kiimaq, Shiikeawe mungtan na saüwan lot mak" (Gal 5:19-21). "Ümchaü sanha, cherop ma naq ja rongkiq she. Che riika namrilung kli mishthen baiq. Kra rii na, Asii Wenyi ma nam mongjii ka kunli tiima lantli si ronglaq" (Eph 5:18).

Jesug raq jurwa wenyi na kham nyangtsi tlaq kriiti ma akha hea wantlo, "Juwa kham nyangtsi, kriiti ka ngi phana warong ra. Lanta, ijaq wa kham ara nyangwa rongkiq" (Jhn 7:37-38). "Warong ra, loweatek khamnyangtsiti ... arjaq kham asi ! Warong ra, namshiq kampho ahütibi ... püwong ka ri lanta phaqaq ronglaq! Warong ra! Spiqtai nai minsäu pü ka ri lanta nyang ronglaq ... namshiq ma rihü maq kuqtlo !" (Isa 55:1). "Jurwa ngi raq akuqha kham nyangtlaq, kriiti ma kham nyangtsi ka dongmak she miraq. Ngi raq akuqha kham ka apaiq tsan mong na, tsitsü khamphok rai se miishe mija

wan. Kiimaq apaiq ma pattup pat-sa rilung she mikuq" (Jhn 4:14).



4. KÜRI SUMLA : Kūri sumla riika roknin riishin, adam ajo maiqbom taimak kiimaq maiquwq maiqlong kra chongtlo. Bom taimak kiqkhiiti ka maiquwq maiqlong jaqsham ikha (1 Sa 15:23). "Roknin riishinti, jaqsham mak haiseati ka, maiqmii kli tsaiphaqtlo. Apaiq riika atsan na, phanrap phanrii alap wanro, kra tiimaseali sitlo" (Tak 21:25-26). Joshua raq Israilnok ma akha nguto, "Arjaq jamlai khephaq wa misihan!

Kotsi tiido ronglaq! Walanta hiqshong ka jiiwantlo ronglaq" (Pho 18:9). Maiqse hanngam ka riininhea. Kiimaq Shiikeawe hupsam lap wan niika tiihit rot hea pinthum. Jesuq raq nguto, "Namshiq ka kilū aranse kiimaq wawan miitu kai shiikut chaq wan ronglaq" (Luk 13:24). "Rittlaqti raq mihum" (Mot 7:8). "Ramungtan

sham akai ka pinthum chiq are raq along aliqli tiichamchao wanto. Kiimaq jasam piqsiiti raq jiiwan miitu shiichaqtlo" (Mot 11:12).

Nashiq tiichhiiwan rilung miitu nai wenyi rilung miitu shili shaqlaq sitibi ka atiisup na maiqmii wenyi ka pattup pat-sa tsailam na mikiho. Akha siraüla, achujaü ma adam miraq. Kiimaq Shiikeawe raq thütlaq tsäuhea phan hupsam kra rit mai miraq. Kiimaq Shiikeawe raq apaiq chithehea kiqkham bomtsi thun kra taomai miraq. Akhla siraüla athenkai lam na mikiho. Ümtiikiiwa Shiikeawe raq ümniirai riibom dam tlaq, ümtsantsii ka ümchaü ranaiq apaiq ma kuqlaq nguta thaü kiiphaüla, thawe riika anaptiq kuqlaq nguta ümniima michong. Riimakla, akhing aten ahea ranaiq niitiq kuqlaq nguta mitiishon. Kriika kiimhü, ümtiikiimin hongtha wa mak bom miraq. Krai mren ümniika ümkhum tiichhiiwanhü miili kiimaq Khristo ahü miili she mitsai haü. Shiikeawe raq ngutlo, "Namshiq raq Shiikeawe bom ka ümchaü ranaiq taihan jiila, namtitiim pat na ikha, nilan ma naqja rongkiq" (Hib 3:7-8). Maiq pahea wenyi na tsai wanto tsangshiq wenyi rilung tiichhiiwan ka akhing aten ahea ranaiq tiq nguta jai na hitbaiq wan lili raüta.

Kriika tsangshiq raq humwan mak she riito.
Anap ranaiq kriika ünnaq rii ka riimak.

Küri raikhüwa asak thun kriika maiquwq
maiqlongti raq maiquwq ma langtlo. Kiimaq arwa
saptiikai, arka awuq along ma kamtsan tsii thü
wan, jaqliiti ma kamwan. Riimakla awuq along
ma kamwan bom kra chongtlo. Atra Shiikeawe
ma kamwan la na arthun arma kamwan kra
chongtlo. Arka akhek anaq maitai akhing na,
kiimaq atsi asi akhing na, chamchao sangrai
akhing na, kiimaq kiimhii maho maajü akhing na,
nashiq raq Shiikeawe ma achu jaü laita sichang
nguta chongtlo. Apaiq ka nashiq khrumke ma
khekham sitlo. Kiim asi nai kiim ahü kriima
kamsea nam miika Shiikeawe miili kamchang.
Jamkhano ngukla, "Tatiwe raq maiqse ka apaiq
kai chang lam na shunsheahotlo" (Sho 37:23).
"Ashi ra atsi asiti asi sha? Apaiq raq phungtuti
maiqlare ka tiiheakai chang. Tsangshiq raq
apaiq miitu achu mijaükuq kiimaq akhum na olip
tel maq Tatiwe mang na minyat kuq. Ara kam
raüta achu jaükuqtlag ariiraq atsi ka ahea
mirki. Tatiwe raq apaiq thatsi ka mitiiheakuq.
Kiimaq apaiq raq ngarai thun tangtaq kriimin
adii mirkuq. Kriikha maq namshiq ngarai thun ka
weshi raq weshi ma diikuq ronglaq. Kiimaq weshi

raq weshi miitu achu jaükuq ronglaq. Kra riihan jiila namshiq tsiisi kriimin mitiieha kuq. Maiqshaqti raq achu ajaü ka ningkun ajong tiidoq ra miraq" (Jak 5:14-15). Shiikeawe raq Israilnok ma akha aming kuqto, "Ümsetiim ka wa berongwacha thun kiijaq honglu na take maimak. Kiimaq namshiq raq langlii min raa mak. Kiimaq atijishi kiimin liikai maimak. Kiimaq mintin klo min mainmak. Kiimaq teitlang kai min maimak. Kiimaq wulum rai riibom kai min maimak. Tatiwe üm Shiikeawe raq akhiinok maiqphai asi kloti ka pinthum tsaihaitlo. Kra ningkhan tiina namshiq raq hiqshong thun ka jiiwan tlan kra phan phan, apaiq raq kra maiq mung thun ka namshiq khaki naq wiita jobaiq wantlaq kra" (Tri 18:10-12). "Shatmaq (ramungtan) chela phai na ahangbaiq wanti maiqse thun kriika ajok aliiq kiimaq maaiquwq maiqlongti, sethoq sepii jawanti, kiimaq showe lumwe ma jawanti, sumla phra noqti, kiimaq abom asa na kiimaq jaqsham kaiwaa na arot akiqti bi thun ka miraq" (Atii 22:15).

"Wulum rai bom riichong raüta tsii chongketi pha na namshiq ka langtlii kai naqki rongkiq. Namshiq raq kra klo hanla, namshiq ka ashe apii maiqse miishe jijaki han. Ngi ka Tatiwe

namshiq Shiikeawe” (Lew 19:31). “Shatmaq maiq raq namshiq ka maiqjaq liitibi kiimaq wulum rai riibomti tha shammibi raq thatam raüta riisham bom chongtlaq kriiti phana riisham bom tiiwaikai mitiiki kiiphanjo. Tsangshiq raq, ‘Maiqse ngutlaq ka tewe shammibi nai peta loqliibi pha niika kaichang dongdii. Raüta maiqse atrati miitu ngi bomchong kriika taichang’ nguta minga” (Isa 8:19-20).

Ümniiraq ara lakdap se ara phattlaü na, Shiikeawe ka ümniirai riibomtlojo. Ümniika üm ngarai mong wa jang wan tlo laq. Kiimaq ümrilung ka Apaiq ma kiinong kuqlaq nguta heatlo. Shatmaq küri wenyi ümtsana mong na sitlaq kra riika, ümniima ümrilung ka ümchaü naq kiinong kuq kiq shaq nguta phanrap phanrii lam tiichhikuq raüta tiikhing baiq tantlo. Kiimaq ümtsana mong na phanrap phanrii haisi rasong chang bomtsi thun kra chongkuqtlo. “Ngi ka Phung na shang wan ha jiika, ijamtitiim raq, ikong ikiimtibi raq, kiimaq nanok raq jamlai wa ngujiiq? Ngi ka awiinum sea na lomdam lot mang she riihajaq jamkho mijaha? Kiimaq phaqaq nai sea parti thun kra kiimaq mungakang hannam polo tiitsaba sea thun kra lomdam lot mang she riihajaq ngi ka jamkho mijaha? Ümbano mikiha?

Khristo Jesuq pum na chiithejong rilung kra chhirii na, apaiq raq akuq awang chang hansang kra lap wan rii na, Apaiq raq akuq nü maq chonglot mai chochi kra lap wan rii na, Apaiq khushü ngao kra lap wan rii na, pattup pat-sa rilung chonjong chise alum alei kra lap wan la na, ümniiraq jamlai phan wa asum chang miraq, kriithun kra khoti michhi haü. Riimakla asum rai chang thun kra khoti ümniiraq michhi haü. Khristo ka ümtsän mong na tiiwa maü riihaü jaq, laüta ümniika maiqse ma haisong kharii nai atsai kai ma hai tsii kra kharü mong niili she misi haü. Laüta ümniika thawe dise miili mithü kiiphaü. Shatmaq Khristo ka maiq ümchu riiwa rilung wiilü tsangshiq ngarai kharü mong na sitlaq thun kra dokdakai, raüta wasetiim ma tiijakai Khristo ka kito" (Hib 2:14-15). Adam ajo winji raq ümniika Shiikeawe bomtsi kra taiwan chang wa roknin riishin ma tiijabaiqtlo. Kiimaq ümtsantsii ka nilan wanshakshak ma tiijabaiqtlo. Raüta ümtsantsii ka küri khü tsindang dang ikha tiitsin baiqtlo.



5. **CHIQWAIQ SUMLA** : Chiqwaiq ka ngamsang phaqtı kiımaq bihea ngamthaiq kaü. Makshu rashe, akhiq ariq kiımaq mokhiqkai hon atsii raq maiqse tsantsii ka jamshatlo. Kiımaq akhing pahea na maiqtsea maiqta na tiisaü wantlo. Ümniıraq ümtsantsii ka anin riila nguta min mıman haü sham, kiımaq la maq ashkhing min mirhaü sham, kra ümtsan khiq sitlaq kra, shatmaq kriika akhing ashi na amok dung dung aphok rai she miraq. Raüta tiibitaq aliichang ahüshe miraq. Kra nam ma khoti kra tsankhiq ka ümtsan mong na asi dea nguta klong klong chong riıwe ka ahea. Laüta Jesuq ma kra kharü mong wa tiichhiikuq laq nguta mra tiidiilaq. "Tsankhiq wokkhiq miika naq tiıtangkiq; kra riika mintsa khoti mitiipa" (Sho 37:8). "Maiqse tsankhiq ka abi, phanrap shiithen baiqtlo. Shatmaq makshu rashe tsii ka, henghea pinthum she" (Tak 27:4). "Tsankhiq ka anin

laüta thülaq. Maiqjiqti riili tiina atsankhiq ka thopshat maq thütlaq” (Pha 7:9). “Tsankhiq bomtsi ka nübok maq tiidong raa mak she” (Kol 3:8).

Maiq haisuti pahea raq abi jaqsham thun kra kloho ma che nyang raüta weshi raq weshi tsaiji ka tiijong ma bomtlo. Kiimaq maiq phuk lamho miimin che nyangtlo. Shatmaq arka, “Paü lai wa spiqtai aklo ikha maiq chok maiq raq” (Tri 32:33). Maiq phuk lam ka ngarai maiqse tsantsii na asumwiq, shatmaq Shiikeawe riika ashut kiimungti thun wiita ma apaiq mo tiihotlo. Jesuq raq nguto, “Ümniiraq ümkhum ka jamkho lungwii tlaü, kiikhiisii hali, ümjam thoti chiiti kiimin lungwiilaq” (Mak 12:31). Kiimaq, “Namjaqti thun ka lungwii ronglaq” (Mot 5:44). Shiikeawe raq nashiq ma ashut kloti mra thun kra diikuq haila, nashiq mra thun kriimin midii kuqha nguta akiq khamkuqto (Mot 6:12). Juwa anü tiibat raü, abot atsaü sitlaq kriiti ka Shiikeawe raq ro mak. Maiqse tsan mong na phuk lam tsantsii walütu nyaitlaq kra kiimaq arlong liiq tsantsii ka maiqse tsan mong na sitlo. Kiimaq arningkhan riikhaqli khusang maq siro jiila tsan ka sanglili hea sichang. Kra raütiq maiqse ka hansang maq misilot.



6. PAÜ SUMLA : Paü raq Ewaq ka sonruk mong wa laoto. Raüta Shiikeawe rai peohea rintii ngatlaq kra kiimaq kongshi kiimshi sitlaq kriiwa tiipan baiqto. Soitan ka Atam nai Ewaq ma pinthum makshu rashe riito. Jamkhano ngukla apaiq raq mangjong hiq kra peng ka chhtio. Kiimaq Shiikeawe rai pumshi hanshi maq singa kra chhito. Kriika apaiq ngachang niishe ngatlaq kra miitu shuto. Amakshutsi ninlot mak kha niishe apaiq raq tsangshiq tiithenbaiq miitu she tri ka süriito. Krai mren, tsangshiq nai Shiikeawe liipan na silu rintii tsantsii sitlaq nai tsangshiq rilung apeo pinthum Shiikeawe rai sitlaq kra tiibunbaiqto. Kra abi phusu sang makshu tsi nai ransu ranchang tsii ka maiqse tsan mong na sitlaq kriiraq maiqse wiijamti peokhiq chochi rilung kra tiithen baiqtlo. Tsangshiq raq nanok ka apeowiq kiimaq chamtraq singa tlaq kriiwa tiithen baiqttlo.

Makshu tsii raq abi tsantsii kra tiidongtlo, raüta maiq ahinti chochi rilung kra tiithenbaiqtlo. Kiimaq maiq ka atsea riibaiqtlo. Arka maiq sinyung siwe liipan na saütlo. "Apewe tsankhiq ka walü wa ikha miraq, kiimaq apewe raq ajaqtiwe jam ka midaqkiq" (Tak 6:34). Piikii lam na kiimaq maiqse rilung laihein lam niimin makshu tsii riika pinthum achong lot mai maiqse ma chamchao tiisaütlo kiimaq phoqngeng tsii wa chaqtlo. Phungmaiqse jaqshamtibi liipan niimin, kiimaq trahoti liipan niimin, kiimaq shrabi liipan niimin makshu rashe tsii ka dongtlo. Arka ümtiikiiwa Shiikeawe raq ajaqshise ka tsanshiq thaq na apa langtlaq akhing na dongtlo. Kriikha na tsangshiq ka miitut wantlii akhingtek na maiqmii honkam shatmaq sichang. Kiimaq Shiikeawe lungwii tsii nashiq mong jii na Asii Wenyi lümaq thiikuqtaq kriiraq asho awo ama maq silili riichang (Rom 5:5). Kra riimakla tsangshiq ka Shiikeawe jaqsham na langtlaq kiimaq tsangshiq traho jaqsham ka makshu rashe tsii raq mitiithenbaiq.



7. JUKMANTSAIKAÜ SUMLA :
Jukmantsaikaü sumla riika shakaq tsii ngarai thun kra chongtlo. Kiimaq kampho ma lungwii ka wiitarü abi dongchang nyungchong (1 Ti 6:10). Konggo mung na jukmantsaikaü wiijam riika saisii phong ka ashi shi maq pahea phaqtlo. Raüta atiisup niika tsang wokpo thun ka aphok raishe raüta jiimtlo chhito. Shakaq tsantsiitiwe riika miitsan maiqse nai athim alitti khrumke na ajaq khon ka tlii maqk. Shatmaq ajiq lam phan raüta jiimin, lamhea lam maq jiimin, ara mangjong hiq wa kampho kra apapa lapha jaq nguta shiichaqtlo. Jesuq apaiq raq nguto, "Namshiq miitu tsiiq nai nyam tum ka mangjong hiq na naqto rongkiq. Arwiika sap nai chhii raq miphaq. Kiimaq thiimeaq raq mitek. Kiimaq ahuk raq mihuk ho. Ara rii na, namshiq miitu tsiiq nai nyam tum ka ramungtan na thü rong laq. Kiiwiika sap nai chhii raq phaqt lot mak she.

Kiimaq thiimeaq riimin tek lot mak she. Kiimaq ahuk riimin huk wa lot mak she. Ara jamkhano ngukla, ümbano ümstsiiq tum totlaü, kiijaq üm tsantsii kiimin mithü haü. Jamkhano ngukla ümstsiiq tum ümbano thütlaü kiijaq ümstantsii kiimin wranaiqshe asi miraq” (Mot 6:19-21). Achan nai ajamtitiim thun ka long maq tiitsailaq tiiqbaiqto. Jamkhano ngukla apaiq raq chaq nai kampho kiimaq khea thun lungwiito (Jos 7). Judas Iskariot, Jesuq jaqshise ka ashakrai raüta tsaito. Jamkhano ngukla apaiq raq kampho lungwii raüta Tatiwe kiimaq Tijongwe ka shaphaqto. Kampho ka abi ka riimak. Chaq kiimin abi ka riimak. Shatmaq kampho ma lungwii tsii ka maiqse tsan mong na atiipaü raüta sitlo. Maiq pahea jechakre nai maiqwere ahing amun raq, ajong aran kiimaq maiqphan angu phan rap phanrii raq, tsangshiq rilung kiimaq tsangshiq jamkun thun wiita tiithenbaiqtlo. Kriika tsangshiq tsan mong na kampho ma süram khana, kampho pahea kiimaq jaqlo liipan niili chithejong ma jahaijaq nguta phaitotlo kiimaq kampho pahea maq kumrang ju riilong na riimakla kuku ju riilong thun na pong raüta kampho phong raüta riitheptlo (betting). Jaqsham hü maq niihü maq kampho pahea laphajaq nguta sükhatlaq kra riili ahuk ma

tiijatlo. Kiimaq matwe ma tiijatlo. Kiimaq maiqmii ajaqlii maq tiihaihiikitlo. Kampho ma lungwii nai sükha tsii rümti miika akong akiimti pahea asi. Bom shiiton maiqmii mang tiijong ro, arang jonghea ho ro, mung khuthaq na mungpeng arang kiimaq kampho ningkun, miitsan maiqse kra ji maq nishishi miitu kamasham lamphan na arangho ro, noqku mang tiijong ka Shiikeawe mang tiijong thaq na araa ma tiija, kamasham maiqse ashi ra noqku na mang twaiq mak maq Khristo jaiphanti tsaiji ka arthun jaqshamti raq trantlo (Mak 9:38). Jesuq raq nguto, Jesuq raq nguto, "Sükha ramho kharü mong na dea man chang miitu, honkamshat maq si rong laq. Ara jamkhano chongtiikang ngukla, riikhaqli maiqse rilung ngutlaq kriika, ajaq na tsiiq anyam rüm tlaq, kra lamlam li ka riimak. Apaiq ka ümtinkhan chiithewe li jiimin ümriilaq" (Luk 12:15). Chiithewe manhan ka akha chongtlo, "Man na maiq chiithewe weshi asi riito. Awak ajam chamtraq asi. Wak wa tsam min pahea lapto. Apaiq ka awintsi miishe, akha nguta atsan mong na tiishomrato, 'Ümchaü kla, i tsam ara thü chang dongdii min, tsamtiip min ahü she. Jam niishe wa misaiq samhea? Akhiitiq nikloha,' nguta apaiq nai apaiq ka tiingoto. 'Ngi raq i tsamtiip arka asiiq mirbaiqha. Lata,

tsamtiip ka ajong linlin she, tiip nye ashi she mihaiha. Lata, i tü i tsam thun kiimaq i hup i sam thun arka, tiip nye niishe mithüha.' Kra lot latiishe, 'Kopan ajongwe le! Ümchaü sanha, phanrap ong laü she. Ümchaü kla, che nyang dungsea, chamtraq tiipong tiipii laütli she peo silaq!' nguta tiishomra siqto. Shatmaq, Shiikeawe raq apaiq ma, 'Ei, angi we loi! Athi rawa li, ümmissaq ka mithumki ngo ka sapphaq maü. Riita ümnaq tsai jai, ümstiiq tum kriika jurshe wa miphesiq?' Ara chong tiikang akhiisii maiq juwa han-ngam niili rongboq win tlaq, shatmaq, Shiikeawe maklii na, miitsan sitlaq, kriiti thun ka athum mirki," (Luk 12:16-21). "Maiq ashi raq mangjong hiq tlotli ka lap raü jiimin, apaiq rilung ka tiimo baiq raü jiika, apaiq ma jamlai liip wa misi? Jamliip min ahü!" (Mak 8:36). "Arkha maq tiina, ngi raq namshiq ma chongkuq tiipha ara. Atra maq siwan miitu, dungjada ra tlaq kra nai khum tiikhe chang khu akhea ra tlaq kra miitu, namshiq ka naq chapa rongkiq ... Kriikha maq, namshiq ka, Shiikeawe Mungtan miituli tiima tsantsii ka atsi maq thü lanta sironglaq. Kiimaq apaiq raq namshiq ma arthun arka mikuq dongdii ... Ara jamkhano chongtiikang ngukla, ümstiiq tum ka ümbano

sitlaq, kriijaq üm̄tsan tsii kiimin misi” (Luk 12:22-34).



8. THAWE (SOITAN) : Apaiq ka üm̄chuwa arot akiq sitlaq kriima awejong. Kiimaq arot chongti tlotli ma awejong.


Apaiq raq nashiq ka arot chong ronglaq nguta tlintlo. Raüta nashiq ma ngarai tiitangtlo. Kiimaq apaiq ka maiqse tsantsii pengti. Jesuq raq nguto, “Nam we ka tha kaü. Namshiq ka thasetiim. Krai mren, nam we jaiphan li lungwii tlan. Apaiq ka man na miiphü dongdii matwe tsawe. Arilung na jangshi min tingting rilung lamphan ka tiima mak dongdii. Ara jamkhano chongtiikang ngukla, apaiq tsantsii ka tingting riimak. Krai mren, apaiq ma arot akiq bomchong ka maiqmii aphara jaqsham. Ara jamkhano chongtiikang ngukla, apaiq ka arot we. Apaiq ka arot akiq dong chong” (Jhn 8:44). Akhüse arot

chong kriimin ajongwiq arot chong krai mrenli. Arot bomtsi ka nū maq min chongtlo. Awaiq thüthlo kiimaq jaqsham maq klotlo. Mongnam arot we. Jamkhano ngukla apaiq ka rakhütsiri na ngoheadea ngochang chang tiichan neitlo. Shatmaq Shiikeawe raq arot ka chonglot mak. Kiimaq Phungmaiqse riimin arot ka chonglot mak (Tit 1:2). "Krai mren, nashiq raq na nū miika apaiq rai pumshi hanshi maq sitiikai nguta nguraü, shatmaq, na chap na nga ka ranyaq mong niili sihai jiika, nashiq ka na bom na nai na chap na nga niika arot she mijaki rong I" (1 Jhn 1:6). "Shatmaq chela phai na ahang baiq wanti maiqse thun kriika, ajok aliiq kiimaq maiqwüq maiqlongti, sethoq sepii jati, kiimaq showe lumwe ma jati, sumla phra noqtibi kiimaq abom asa na kiimaq jaqsham kaiwa na arot akiq wanti bi thun ka miraq" (Atii 22:15). "Shiikeawe raq rung na arot saqse keti, kiimaq maiqjam kun na tatso tiidongti ka saisitlo" (Tak 6:19).



9. RAIQSAIQPO SUMLA : Raiqsaiqpo sumla kriika maiqse loweatek tsan mong kappe sitlaq kra chongtlo. Arjaq arka ashe kiimaq abi, arka riilü wantlii kiimaq samsam maq sapshat shat taü maq ngarai tang raüta atsai she arki kra chongtlo sham. Arka makchuk kiimaq ngaraibu kaü she. Kra ningkhan apaiq raq ajiq sha alam wa klotlaq kriika shintsü mak she. Ara abi tiima tsantsii arka, jangshi shi ka kaiqshak shak miraq, jangshi shi ka achapa miraq. Ariiriika jangshi shi ka apaiq kli mitiijiq. Kiimaq jangshi shi ka apaiq ka ajiq nguta shra chang wiika shra mak, ahea nguta tiinyea baiqtlo. Arka amaa kaiwische moraq miraq. Jinkii wa na kehea tiipü raüta achin rat ikha. Kiimaq kamasham ka miimbaiqthü raüta ajiq alam min sapmak she, shintsü mak she, ja liija li she moraq miraq. Arka arot winji thun wokhong na si klishe kiimaq tsak amii thun traho bomchong kra lang

wan raüta, kiimaq arot laopha shrabi traho raq nyam wantlaq bomchong kra lang raüta atsai kaikun she moraq miraq (1 Ti 4:1-2; Hib 10:22).



10. **MAKPO SUMLA** : Shiikeawe makpo raq maiqse tsan mong na jamlai wa tiimatlaq kra wiita achhi siisaq. Apaiq makpo walütu ikha nyaitlaq krii wiika jamlai phan min tiipaü shan kai chang ahü. Krai mren Apaiq raq wiita asap kiimaq maiqse tsan mong na ahuk se maq jamlai wa tiimatlaq kiimaq akha mirha nguta thapthi tlaq kra wiita asap. Ümniiraq ümjaqsham abi klo tlaü kriika ranyaq tangtang mong maq klo kaülo, rum nyangkhi maq klo kaülo, khobok tsaühea mong maq klo kaülo, riimakla ümriiba maq klo kaülo, Shiikeawe riika rashra chhishat. (Ara sumla mong na maiq makpo wiinai riika maiqwe theaphi na jamkhiwa tiichhitlaq kra i mren damtlo).



11. **WANIITU TITLISETIIM SUMLA** : Ara waniitusetiim maiqse tsan mong trotam na sitlaq thun ka Shiikeawe lungwiitsii raq ngarai tsantsii kra komshat sitlo kra chongtlo. Shiikeawe raq ngarai ka asaisi riitlo. Shatmaq Apaiq raq maiqse ka lungwiitlo. Kiimaq ngarai maiqse tsaikai ka romak. Shatmaq apaiq ka apaiq ngarai lam phan wa jang wan raüta atra misi laq nguta tsin ngintlo (2 Pe 3:9). Jesuq ka ngarai maiqse ashi raq mra diidii wan raüla ramungtanti ka pinthum chochitlo (Luk 15:7). Kiimaq kra tili ransetiim thun sumla riika Jesuq Khristo tijai kra chongtlo. "Liironglaq ahata, mangjong maiqse ngarai howanti Shiikeawe Sku Se" (Jhn 1:29).



12. RASE SUMLA : Rase sumla riika Shiikeawe Bomtsi kra chongtlo. Shiikeawe raq juwa tlaο raitlaqtibi rai riibom rotlo. Raūta tsangshiq raq ngarai homa laihea thun kra ho raūta sitlaq kriiti rai riibomdam rotlo. Raūta tsangshiq ka tsangshiq ngarai maho raq patraitlaq kriiwa jang wantlo raūjaq ahea riichang. Kiimaq Shiikeawe rawūli nai Shiikeawe lungwii tsii rawūli ka tsangshiq tsan mong na tiinyap raūjaq ahea riichang nguta tsin ngintlo.




13. **PARO KAÜ SUMLA** : Paro kaü sumla ka Asii Wenyi sitlaq kra tiijitlo. Asii Wenyi riika Shiikeawe hon atsii kra tiichhikuqtlo. Kiimaq, ngarai kra tiichhikuqtlo. Kiimaq riikhaqli lamphan kra tiichhikuqtlo. Kiimaq Shiikeawe raq kha photlaq kra chongkuqtlo (Jhn 15:26). Arjaq Asii Wenyi ka maiqse tsan mong maq kinphai na tiichhitlo. Ngarai raq maiqse tsantsii pengtlaq kriijaq apaiq ka siwa lot mak.

Ara maiqse tsantsii sumla akha ümtsantsii kiimin akha jiila, Tatiwe man na hoq laüta achu jaülaq. Üm mongjii ka Apaiq ma linkuq laq. Apaiq Bomtsi ka kra mong na mili liim laq. "Tati Jesuq ma kamlaq. Raüla ümkhum ka michhiikuq" (Kiim 16:31). Shiikeawe riika rotlo, teng teng. Apaig raq ümtsanstii kra klaike lungwiitlo. Raüta ümniima tsantsii anye kiimaq khutsai anye

klaike rotlo (Eje 11:19). Arka sumla anai ngoja
kriijaq tiikhang chongkuqtlo.

Copyright ANGP

2. NGARAI TANGKANG DEA NGUTA ASAPTI TSANTSII



Ara sumla na ngarai tiidii wan tsantsii kra tiichhitlo. Raüta Shiikeawe theaphi lii wan kra tiichhitlo. Rase ka nepja do raü, kriika

Shiikeawe Bomtsi, "atra kiimaq jamlai phan na seng raütiwa bomtaq, kra sham wan ruq phan. Aniq min sihea, khubinlo panthit. Bomtsi raq maiqse tsaiji kiimaq wenyi wiita riip wan tlo. Kiimaq maiqse khum na arok ariitsai sitlaq thun kra wiita kunli han wan tlo. Kiimaq maiqse tsan mong na, tiima tsantsii jamlai wa rümtlaq kra thun wiita, kunli chechiiptlo" (Hib 4:12). Shiikeawe bomtsi raq apaiq ma bliiq chongkuq nongtlo, "ngarai jaq maq ka tsailam (Rom 6:23). Kiimaq "maiqse angu ka khumtek lakshi ka tsai chang dongdii. Kra jai miitiq, Shiikeawe raq apaiq kha kamipho kuq wan" (Hib 9:27). "Ngarai maiqse nai thatsang maiqse sichang ka wamungtan na nyiimwin wa ikha nyairai tlaq kiijaq mitiidea baiq" (Atii 21:8).

Ara sumla na rase raq ajaq jaqko niika maiqkhurii sham raü tiichhitlo. Arka ngarai maiqse ma nashiq tarü ka ranaiqshi shi ka atsaikai chang siisaq nguta bliiq chongkuqtlo. Nashiq raq nakhum ka pinthum lungwii tiikai. Laita, khea sam tiikai, dunghiq tiikai, kiimaq tiitsom rom tiikai, atinkhan tsrup riiq tiikai kiimaq hanggam ramho thun kra pongpii wan tiikai. Kiimaq hanggam raq jamlai wa jaütlaq kra atsan tiiheali miitu shiililii tiikai. Arka ranaiq


shishi ka atsai mirki. Raüta ariim mirki. Kiimaq ajong raq miphaqbaiq. Raüta mitiithenbaiq. Shatmaq nashiq tsaiji kiimaq wenyi ka pattup pat-sa siruqli misi. Kiimaq ranaiq shi akhing na Khristo man na achap chang miraq. Raüta Apaiq raq kha ka mipho (2 Ko 5:10).

Arjaq nashiq raq ngarai maiqse ashi raq Shiikeawe tsütsa kra chhiphaho räushe chhitiikai. Raüta apaiq tsantsii ka Shiikeawe raq lungwiitlaq kriima atsantsii kilü ka dikuq phahotlo chhitiikai. Asii Wenyi raq kra ranyaq ngarai maiqse tsantsii mong na rawüli ka tliphahotlo she chhitiikai. Shiikeawe rawüli ka atsan mong na liliim phahotlo. Raüta ranyaq tangtang sitlaq kra, rawüli she tiisaütlo chhitiikai. Ümtiikiiwa Shiikeawe rawüli kriishe saütlaq, ranyaq thun kriika akaiho chang she. Ngarai thun ka arjaq sumla na phanrap phanrii ngamsaü ngiqse sumla thun maq tiichhi kuqtlo. Arthun ka ajuho chang she saütlo. Arningkhan lungwii phunaino ara lakdapse ara phattibi lei, Jesuq ka mangjong maiqse ma rawütu, kra ümtsän mong na tiwalaq. Kiimaq kra riihaüla, ranyaq sitlaq thun kra kiimaq abi jaqsham sitlaq thun kriika ümkhiiriita jiimin tsan mong kiiwa akaiho chang she miraq. Arjaq sumla na

chhitiikai akha mikho. Jesuq raq nguto, "Ngi ahata mangjong maiqse ma rawü li. Juwa i puk na nyap tlaq kriiti raq rilung rawü milap wan. Kiimaq ümtiikiimin ranyaq mong na khum mak she miraq" (Jhn 8:12). Ümniiriika ümkhiiriita jiimin ümningkun maq ümtsán mongwa ngarai thun ka jobaiqlot maü. Üm taksu phaqqhi maq, riimakla maiqse taksu tsii maq jobaiqlot maü. Aje pinthum, kiimaq tengteng, jaqlo pinthum tiidoqra tang wantlii lamlu kriika, Rawü tu, Jesuq apaiq sitlaq kriili dongdii, ümtsán mong na tiiwa laq. Raüla ranyaq nyang, ngaraibu ümtsán mong na sitlaq sitlaq kriika kaiho raa dongdii she miraq. Jipi kaü nai raiqsaiqpo thun riika nashiq miitu rawa ranyaq tangtang na phanshi ra se khrumli mikuq. Shatmaq ümtiikiiwa rashekaü she dong wantlaq, kra raüla, ranyaq nyang nai waniitusetiim aransetiim sitlaq kriika amo she riikitlo. Jesuq kata kechu Rashekaü. Ümtiikiiwa Apaiq ka Jerusalem Shomjam mong na wataq, Apaiq raq kiijaq lairap hupsam shatati thun nai hupsam rithiiti thun ka wiita jobaiqto. Apaiq raq kampho chakti chamrii thun kra wiita akap riibaiqto. Kiimaq parokong shati chamrii ransetiim thun kra kapbaiqto. Kriithun ka Apaiq raq akha ngu raüta kapbaiqto, "Asii Lakdap na Shiikeawe raq akha chongto, 'I

Shomjam ka achu jaü chang jam miraq.' Shatmaq namshiq ara shomjam arka ahuk arot kong tiibo chang jam miishe tiija baiqho lan!" (Mot 21:13). Ümütsan ka Shiikeawe sichang jam, Shiikeawe shomjam. Apaiq ka kiijaq si lungwiilo. Raüta kra pinthum tsomhea klo rotlo. Raüta walüli wali ali aliim tiija rotlo. Kiimaq lungwiitsii kiimaq chochi raq asho awo tiima rotlo. Jesuq ka nashiq ngarai thun jobaiqkai lamlamli aki ka riimak. Shatmaq nashiq ka ngarai ningkun kharü mong wa dokda raüta wasetiim ma tiija kai kito. "Ase (Jesuq) raq namshiq ka daa wan raütiq, namshiq ka riikhaqli wasetiim ma mija wan lot han" (Jhn 8:36).

3. MRA TIIDII WANTLAQTI TSANTSII



Ara sumla na nashiq ma riikhaqli maq ngarai tiidii wanti ngarai maiqse tsantsii kra tiichhikuqtlo. Ümchaü apaiq raq ümtinkhan ngarai thun jonghea kiimaq phiiptsi chang ngarai

thun tang wantaq kriishe chhitlo. Kriithun ngarai miitu Jesuq ka pumsongkham na tsaitaq kra chhitlo. Apaiq raq rase jaq na sham raü pumsongkham, kiimaq Shiikeawe Bomtsi kriiraq apaiq ma tiichhikuqtlo. Kriiraq ümchaü atsantsii na shut kangdea ngutiishe tumtlaq kriishe tiininta raüta atsan mong na tsaühea atsi maq shut wan kang dea nguta apaiq ngarai mahotlaq thun kra miitu atsan bitlo. Kiimaq apaiq raq Shiikeawe mangchan tsii jonghea Khristo Jesuq pum na tiichhikuqtlaq kriishe saptlo. Ara mangchan tsii raq atsan tsii kriishe tijambaiqtlo. Akhek ka apaiq raq Shiikeawe Se Jesuq Khristo ka apaiq ngarai ma thun achong lot mai kra hokai kito nguta bomtsi kra saptlo. Jesuq Khristo ka apaiq miitu pumsongkham na tsaito nguta kra saptlo.

Jesuq ka chunpo-nyam chongwai maq tsatto. Kiimaq akhu na shukkhuphok tiiphokto. Kiimaq Ajaq wiinai na nai ahok wiinai na khili maq tüto. Raüta pumsongkham na nashiq ngarai thun miitu tsaito. Arthun bomtsi arka ngarai maiqse tsantsii na washasha she tiichhikuqtlo. Raüta apaiq tsantsii nai apaiq rilung ka klang miitaq tinsang akelai she riibaiqto. Apaiq raq Shiikeawe Bomtsi kra phat raüta kiijaq apaiq pumsii rilung


sumla kra chamni mong na ikha liitlo. Raüta apaiq raq apa sap wan wan apaiq ka Shiikeawe phawa luhea niidea kihokang nguta saptlo. Kiimaq Apaiq aming thun kra jinkang dea ngutiishe saptlo. Raüta apaiq ka atsan mong na tsanbi taqtaq she kiimaq shutkang dea nguta tsan na atsi maq hoqtlo. Kiimaq apaiq raq atsantsii ka Shiikeawe ma linkup raüta kiinong kuq wantlaq makphai khüshang aho anyi lam maq, krai mren Jesuq raq apaiq ka Apaiq thoniishe shun shea wantlo. Shiikeawe lungwiitsii nai Shiikeawe khusang ka apaiq mongjii niishe shang wantlo. Kiimaq apaiq raq tak wantlo. "Shiikeawe Se Jesup tiijai maq nashiq khum na phanrap ngarai sitlaq thun kra wiita mitiisii he baiq" (1 Jhn 1:7) ngutiishe tak wantlo. "Imongjii ka siirairai she tiijalaq, O Shiikeawe lei, laüta itsan mong na wenyi anye kiimaq ümniirai tiipumtlii siti wenyi thiikuqlaq" (Sho 51:10). Kiimaq Shiikeawe Bomtsi raq akha ngutlo, "Ngi ka juwa saksi minmi kiimaq maiqmii mra tiidii raüta hoqtlaq, kiimaq jurwa Ngi ma haitlaq raüta i bom taitlaq kriiti ma khoqriiq tiikang" (Isa 66:2). Asii Wenyi raq Jesuq bomtsi ka apaiq ma khangririhea chongkuqtlo, "I se loi, ümtsaiji ka tiijong laq! Ümngarai ka diikuqto she" (Mot 9:2). Apaiq raq

pumsongkham kra liitlaq liipan niili kiimaq Jesuq tiijai pumsongkham na raütaq kra liitlaq liipan na, apaiq raq kriithun ka apaiq miitu raüto nguta kamtlaq kra phan phan, apaiq khum wa ngarai maholai thun kriika lambaiqto she nguta misap. Jamkhano ngukla nashiq raq chamchao wan chang wa Jesuq raq chamchao homa ka howanto. Kriika, "Shatmaq nashiq ngarai kha na paiq raq mopung hoto," Kiimaq "Nashiq thatsi ka apaiq raq moho wantaq kriimaq tiiheato, apaiq raq maiqmo howantaq kriimaq nashiq ka phintsaq tsaqhea tiijato. Nashiq raq abi klo kha na apaiq ka bunlak tsatto" (Isa 53:5) nguta chongtlaq kriishe saptlo.

Raüta Asii Wenyi nai Shiikeawe riishe asii tsantsii kra pengtlo. Apaiq raq Jesuq ma kamtlaq kra pahn phan, apaiq ngarai homa thun ka wiita diibaiqto she nguta saptlo. Krai mren she apaiq raq atsan mong na kamto she Shiikeawe Se, Jesuq Khristo tiijai maq akhum ka wiita ngarai mong wa tiisii kuq wanto she nguta taktlo (1 Jhn 1:7). Apaiq ka ümchaü kamto she maiq loweatek Jesuq ma kamti ka wenyi na tsai mak she miraq. Shatmaq pattup pat-sa rilung she milap (Jhn 3:16) nguta saptlo. Jamkhano ngukla, "Jesuq Khristo

tsaitaq kra lümaq, nashiq ka thawe kharü mong wa daa wanto she. Ümchaü sanha nashiq ngarai ka diikuqto she. Nashiq ka wasetiim miishe tiija wanto" (Eph 1:7). Maiqse ngarai hanngam ramho ka ümchaü Shiikeawe lungwii miitu kiimaq apaiq shiikiimpan miitu she kuqto. "Apaiq raq nashiq apha lungwiito" (1 Jhn 4:19). Ümchaü ka mangjong hiq nai mangjonghiq wa hupsam kra lungwii la na apaiq raq Shiikeawe she lungwiitlo. Ara sumla na, nashiq raq ngamsaü ngiqse sumla phong chhitiikai arka, ngarai thun kra chongtlo. Arthun arka ümchaü tsan mong kinphai niishe sitlo. Kiimaq thawe ka apaiq jamchü kra miimthü romak li jiimin, apaiq riika ümchaü min jai nü na liishlii, kiimaq jangshi ra akhing ahea lap raüla ajang wa nong ma nguta ransh ran khetlo. Kra ningkhan tiina Tati Jesuq raq nashiq ma hon chong bomtsi chongtlo nashiq ka honkamshat maq sichang nguta. Kiimaq achu jaü maq sichang nguta chongtlo. Araka tawe kra wiithu wiiliiq jobaiq miitu chongtlo. Raüta apaiq ka nashiq pha wa aju mirho (Jak 4:7).

4. JESUQ RAI TSAITLO



Ara sumla niika Phungmaiqse jurwa Tati kiimaq
Chhiiti Jesuq Khristo tsaitaq kra lümaq minhap
hansang rilung kiimaq pattup pat-sa tiichhiwan
rilung lap wantaq kra tiichhitlo. Krai mren apaiq

ka laihin jamlai miimin tiishom raa mak she. Jesuq miiliche tiitsamtlo. Asii Bomtsi na chongtlo, "Tati Jesuq Khristo pumsongkham na tsaitaq, kra shomra tiikang, kriili she. Ara jamkhano chongtiikang ngukla, apaiq tsaitaq pumsongkham lümaq, mangjong hiq rilung lam phan na, jamlai phan wa araa ariq phan nguta weawun wan tlaq thun kriika, ümchaü sanha, ngi miika hiqtili ikhli she. Ngi ka arthun armiika, atsaikai kun she" (Gal 6:14). Jesuq ka pumsongkham na tsaito. Kriika nashiq min atsaikai miitu riito. Arka nashiq ka, "Arka nashiq ngarai na tsikai miitu. Laita nashiq ka kechu miitu lische atra siwan miitu tsaito" (1 Pe 2:24) nguta chongtlo. Phungmaiqse ashi ka mangjong hiq miitu atsaikai wishe. Nashiq ma akha aming kuqtlo, "Ümchaü sanha, namrilung ka, Asii Wenyi ma tiishun shea lantli she, sironglaq. Asii Wenyi raq, nashiq ma rilung she kuqto. Krai mren, nashiq tsan nai mongjii arka, Asii Wenyi raq dongdiitiq she peng chang" (Gal 5:16,25) nguta chongtlo.

Khamchong Jesuq dü wa akhea kra chhutbaiq raüta apaiq khachang kham chong kriika ara tsantsii sumla na tiichhitlo. Kiimaq chungpo-nyam chongwai tsangshiq raq apaiq pinthum bihea maq

tsattaq kriimin tiichhitlo. Apaiq ka nashiq ngarai miitu tsaito. "Nashiq thatsi ka apaiq raq moho wantaq kriimaq tiiheato" (Isa 53:5) nguta chongtlo. Herod nai phenlabi thun raq naiküto. Kiimaq Apaiq ka chungpo-nyam chongwai maq tsatto. Tsangshiq raq akhupo na shuk khuphok kra tiiphok kuqto. Tsangshiq raq Apaiq ma chaq khuphok tiiphok ke la na shuk khuphok tiiphok kuqto. Kriimaq tsangshiq raq nyeakii ashi ka Apaiq ma jaqtsi nü na tiishamto. Kriika hokham chongwai kii tiishamke la na tiishamto. Raüta tsangshiq ka Apaiq khaki na hiq na kuhihi raüta ashum miitsi ma noqsiqto. Kra noqlam maq akha nguto, "Rilung alu maq silaq Jehudinok Hokhamwe lei." Kiimaq tsangshiq raq Adü na tho maq thoto. Kiimaq ajaq wa nyeakii ka nyeato. Raütsa Apaiq ka hot-hot akhupo na tsatto. Tsangshiq raq Apaiq ka pinthum haihii lot raütiishe Apaiq ka chiiphai na hit hoto. Raüta pumsongkham na tübaiqto (Mot 27:27-31).

Maiqse ka Phungkhü maq tiihong raüta siti maiq pahea asi. Tsangshiq raq achu jaütlo, kiimaq Tatiwe Poi ka lomdamtlo, Shiikeawe ma ashi ange shingetlo. Li jiimin, tsangshiq ngarai jaqsham thun kriimaq, Shiikeawe Se ka

wranaiqshe pumsongkham na tūbaiqtlo (Hib 6:6-7). Asii Bomtsi na chongtlo, "Ngi nangnga, 'Tatiwe loi, Tatiwe loi' nguta ngoti tarū ka Ramungtan na saūlot mak. Shatmaq jurwa ramungtan na siti i We aming ka lang raūta sitlaqti kli misaū wan" (Mot 7:21-27 nguta chongtlo.

Ara sumla na Judas kampho thongkhiiq kriimin chhitiikai. Apaiq raq Tati Jesuq ka tiishaūbaiqto. Raūta shaphaqto. Kampho kamsii roqtsam phana shaphaqto. Jamkhano ngukla apaiq tsantsii ka kampho ma sūkha tsii kriiraq akhaho wishe riito. Apaiq tsan niika kampho ma sūkha tsii kriili she riito. Kiimaq lemtem, jinraū, thun sumla kriimin asi. Kriithun ka phenlabi raq Jesuq ka rawa na lap wa raūra kharū maq khahotaq kra chongtlo. Kiimaq phaito chang longpo thun kra akhing pahea na maiqse raq phaito ma langtlo. Kriika phenlabi raq Jesuq khea riiphea miitu toto. Asii Bomtsi akha chongtlo, "Tsangshiq raq ikhea miitu phai totlo raūta tsangshiq liipan na riiphea phaqtō" (Sho 22:18). Tsangshiq raq Jesuq dū wa hupsam wiita nyeahoto. Shatmaq tsangshiq raq Apaiq pumsii kriika atiishaū riibaiqto. Akha ngu raūta

tiishaübaiqto, "Naishiq raq arwe arka nai hokham ma shongro mai."

Maiqse ka wanghap ngusaq na tarü raq Shiikeawe achu shiiman ka lap rotlo. Rajuntlaq kra kiimaq rashe kiitlaq kra. Shatmaq tsangshiq rilung ka Shiikeawe ka tsangshiq Tati kiimaq Tijongwe nguta shiikumpan jaqsham na kiinongke ka romak. Maiqse apako miika Shiikeawe ka tsangshiq chamchao litkot nai pitlang pit thea akhing na khrumke lamlam miituli ahea nguta tiimatlo.


"Piq maq Jesuq siimpai na shukto. Kra shuk ri li she, piq mi kriimaq tijai nai kham ka ajia lili she dongto" (Jhn 19:33-37). Wu miwa shaq na Petar raq jangtsam Jesuq ka sap mang nguta tiishaüto. Shatmaq kra jai maq apaiq ka aho gugu mra tiidiito (Mot 26:69-76). Ümniiraq Jesuq Khristo ma ümtsantsii ka kiinong kuqkang she nguta tantan ümnübok maq nai ümjaqsham maq chongtlaü shea? Shea ümniika nanok raq sapjiiq nguta ajeasi wa riitlaü? Jesuq raq nguto, "Jurwa nokwe man na apaiq ka i sengi nguta tantan maq siwan tlaq, kriiti miitu ka ngi riimin i We man na, ramungtan maq Phangthum Khapho Ranaiq kholam kholiq hakhi mikuq wan ha. Shatmaq jurwa apaiq ka i sengi riimak

nguta nokwe man na ngi ka tiishaü baiq wan tlaq, Phangthum Khapho Ranaiq ramungtan maq, i We man na, ngi riimin, kriiti ka atiishaü mirbaiq wan ha” (Mot 10:32-33).

Jesug raq akhiimin nguto, “Jurwa maiqmii pumsongkham ka pishat maq i jai phanphan wamak, kriiti ka i jaqshise ma jawan lot mak” (Mot 10:38). Peohea jurwa Longkaü, Jesug Khristo tiiwong na sitlaq!

“Rathup longkaü, linkuq laq ngi ma,
Ümdü na tiipaü pha;
Kham nai, tiijai ka mikilaq,
Ümsiim ariip kiimaq mikilaq,
Ngarai tiiheake ningkun,
Tiisiilaq ashut jaqsham wa.”

5. SHIIKEAWE SHOMJAM



Ara sumla na Shiikeawe kaphap kiimaq tiihang mangchan asho awo maq atiichhii wan wishe ngarai maiqse tsantsii siirairai asii she kiimaq asii kechu tsantsii kra tiichhitlo. Arka riikhaqli

shomjam miishe jakito. Arka Shiikea Awe, Shiikea Ase kiimaq Asii Wenyi jam miishe jakito. Arka Tati Jesuq Khristo raq kiqkham kuqtaq kra phan phan kuqto. Kiqkham ka akha, "Jurwa ngi lungwii tlaq, kriiti ka i wokhong na, i bom chong ka phaqqhii nichii maq tai raüta misi. I We raq apaiq ka kai milungwii. Kiimaq, i We nainai ka kilaita, apaiq rai adam na misihai" (Jhn 14:23) nguta chongtlo. Kriiti ka Shiikeawe raq shrengtlo, kiimaq rana do raüta tiijongtlo (Luk 1:52).

Maiqse tsantsii ka ümchaü riikhaqli Shiikeawe shomjam miishe jakito. Ngarai ka jobaiqto she. Arot akiq thun ma awejong Soitan wokhong na siti phanrap phanrii ngamsaü ngiqse thun ka ümchaü nashiq raq maiq tsan mong na Asii Wenyi, Tengteng Wenyi kriishe sitlo chhitiikai. Ngarai tai ase chang hiq ba rii na, maiq tsantsii ka atsomwiq, atsi ango petsi chong miishe jakito chhitiikai. Riimakla sonruk ashi miishe jakito. Asii Wenyi tsi thun kriishe tsingotlo. Kriithun ka arthun ara: lungwiitsii, hansang, anin wan, arlungwii, athuk atsom, atsap akap, sobsob bombom, kai stiiskhaq raüta shongnga rilung, kiimaq ahin thun min maiq raq ahea dea nguta tao chang thun kiimaq Shiikeawe nai

maiqse tiichochi chang thun, kra chongtlo. Apaiq ka ümchaü atsi ango asi chiisan spiq chong nashiq Tati Jesuq kü miishe jakito. Ara apaiq ka atsi ango chong ashi ma jakitaq arka Khristo rai pumshi hanshi maq tiipum siwan kha niishe tsingotlo. Kiimaq Khristo nai Apaiq Bomtsi ka apaiq khum na sitlo (Jhn 15:1-10). Jamkhiiwa apaiq ka Asii Wenyi raq tiimataq kiimaq Asii Wenyi maq kham lamkuqtaq, apaiq khum na maiqse joli hanngam phara hon aja thun kra nai naangam phara hanho sitlaq thun kra wiita she tangto. Kriimaq kriithun ka wiita tiitsailaq she tsatbaiqto (Gal 5:24). Asii Wenyi riishe arilung kra shunsheatlo. Kiimaq apaiq khum wa maiqse hanngam ramho sükha thun kra dunghiq mak she (Gal 5:16). Ümchaü apaiq ka mak maq achhi achhi, ni maq atai atai kiimaq ajaq maq asham sham, kra phan phan ka lang räuta shongnga mak she. Shatmaq kamtsantsii miili she sitlo. "Riita nashiq raq ara mangjong hiq tang lot tiikai arka, nashiq raq Jesuq ma kamtsantsii thü tiikai kra lümaq tang tiikai (1 Jhn 5:4). Apaiq ka kamto milapha dongdii nguta kiimaq rantsantsii maq sitlo. Kiimaq jaqlo lishe Tati Jesuq Khristo ka misaüho she nguta khetiikai kriima kamto maq sitlo. Apaiq ka pattup pat-sa Shiikeawe mangchan sitlaq kra

wokhong maq sitlo. Asii Bomtsi na kha chongtlo, "Juwa tsantsii asii kriiti ma chochi; tsangshiq raq Shiikeawe michhi !" (Mot 5:8). Hokhamwe Dawit raq apaiq chithe jonghea kra taü maq, kiimaq ajaqtibi thun kra tang wan raütii min, apaiq tsan mong niika rakhat wiita thaq na jonghea asi nguta asap. Kiimaq apaiq kamasham na tsaühea tsihea kham nyangtsi tlaq kra ningkhan na akha achu jaüto, "Imongjii ka siirairai she tiijalaq, O Shiikeawe lei, laüta itsan mong na wenyi anye kiimaq ümniirai tiipumtlii siti wenyi thiikuqlaq" (Sho 51:10). Jurmin maiqmii tsantsii ka tiisiilot mak. Kriika Dawit raq mra tiidii raüta Shiikeawe phana wataq kiikha wahü miika siimak. Shiikeawe phana wa raüta tsantsii asii tiiquq laq nguta achu jaü chang. Shiikeawe riika ümrilung ka anye ma tiiqke lungwiitlo. Ümkhum wa ümrong ümrai ahea wa atiichai arki thun kriika khea chhangtlaq ikha achhang laüta arot akiq kiqkham thun maq pang raü ka taimak. Kiimaq arka ahea dea akamsea chang dea nguta nguraü min tai mak. Kriithun riika ümtsantsii ka Shiikeawe sichang miika tiija wanlot mak. Apaiq ka ümnaq khrumke miitu khekham maq sitlo. Jamkhano ngukla apaiq raq akha kiqkham kuqto, "Ngi raq namshiq khum na kham asii maq

mibatha. Lata namshiq raq sumla phra thun noq lanta kiimaq phanrap ashe ashi klo wan lanta, namkhum tiisheshi baiq lan kra, Ngi raq wiita atiisii mirkuqha. Ngi raq namshiq ma tsantsii anye mikuqha kiimaq khutsai min anye she mikuqha. Ngi raq namshiq wanshakshak longkaü tsantsii kra alam she mirbaiqha. Lata ibom taiti tsantsii she mikuqha. Ngi raq iwenyi ka namtsan mong niishe mithii kuqha. Kiimaq namshiq raq Ngi raq akuqha tri raütu thun kra nai aming thun kra lang wan lanta siwan miitu she milii kuqha” (Eje 36:25-27). Ahata Tongshong Nye tsütsa Shiikeawe raq nashiq ma akuq Ase Jesuq Khristo pum lümaq.


Ara sumla na nashiq raq rase ka thongshi ri hali saüki nongto chhitiikai. Asii Bomtsi na akha chongtlo, “Apaq rase raq Tatiwe shrengtibi ka kheshat tiiwongtlo kiimaq akhlaq chang wa tsangshiq ka tiichhiikuqtlo” (Sho 34:7; 91:11; Dan 6:22; Mot 2:13; 13:39; 18:10; Kiim 5:19; 12:7-10).

Thawe kriimin ara sumla na tiichhitlo. Apaq ka tsantsii thona chap raü. Apaq ma jamchü kra mong na anyap wa nong miitu liishat riitlo. Arkha na nashiq ma, “Honkam shat rong laq! Khekham si ronglaq! Namjaqti, Thawe ka,

namshiq tro na ashi ra kaqphaq hoha jaq nguta, hangsi kaü ikha, agam agu wa la, khum tlo” (1 Pe 5:8) nguta tsii chongkuqtlo. Jang pahea na, apaiq ka rawü lam rase ikha tlaö raüta sitlo. Raüta ümtum ümmäi siti Shiikeawe setiim ara mangjong hiq ramho rümtibi kra laophaqho miitu khetlo. Raüta apaiq khonglaq hea phaqqhi kriimaq Shiikeawe sengi maiqsetiim thun ka laotlo. Shatmaq, nashiq raq thawe ka along aliiq riihaila, apaiq ka nashiq thowa alu na mijuhö (Jak 4:7).

Copyright ANGP

6. MAITAI MONG NA NAI TIIMA ANAI RÜMTI TSANTSII



Ara sumla arka tsanbi chang jai na jang wanti sumla. Amak po ashiti ka achuk she riiwanto. Kriika apaiq ka Phungmai qse rilung na akaiq she

riiwanto kiimaq akon she riitlo nguta tiichhitlo. Kiimaq makko nūti riika ajeasi min ahū maq tro tri liitlo. Raūta mangjong hiq rilung kra lungwiitlo. Among wa wa ka aham she riiwanto. Kiimaq atsan mong na Khristo miitu chamchao ka amoshe riiwanto. Kiimaq atsantsii ka tingting ka riimak she. Apaiq tro tam niika apaiq ma maitai phong kriishe saū wanto kiimaq apaiq raq kriithun ka ajobaiq rii na maitai thun thiikho niishe chhan wantlo. Apaiq raq Shiikeawe bomtsi kra tiitsang tairii na thawe raq chongtlaq bomtsi tiishon bom chongkuq tlaq thun kriishe taitlo. Kiimaq arot akiq mikuqha nguta kiqkham kuqtlag kriithun kriishe atsan na tiitsang hoto. Apaiq ūmchaū min noqku niika kitlo. Kiimaq atsan mong na mangjongg hiq rilung lungwiiro ka apaū raūta kamasham mang na thūtlo. Shiikeawe ma lungwiitsii ka atsan mong na akaiq she riiwanto. Apaiq ka tsan nai she. Lamhum anai ba na chap raū she. Apaiq ka mangjong hiq wa hupsam krai she tiitsaba tlo. Shatmaq Shiikeawe ka lungwiitiikang nguta tiingotlo. Atsan mong wa raiqsaiqpo na wa nyaitlaq, apaiq tsantsii ajiq alam shinti walūli ka ūmchaū aham she riiwanto. Pumsongkham ka chojong chise maq pimak she. Shatmaq mintsa pa jonghea ashi miishe jakito. Laihea she.

Apaiq kantsantsii ka atiime she riitlo. Apaiq ka Shiikeawee rai achu jaü maq riibomdam mak she. Kiimaq apaiq raq atsantsii ka jamkho sitlaq kra miitu ka brorii mak she. Kiimaq ümtum ümmi she. Raüta thawe apaiq raq apaiq tsantsii kinphai na khesat maq khetlaq kriima khok she dikuqtlo. Apaiq raq riikhaqli Shiikeawe setiim rai rintii nga ka lungwii mak she. Kiimaq ngarai maiqsetiim rai rintii riikong nga kriili she lungwiitlo.

Wudong sumla ka ashkong tsii kra chongtlo. Apaiq ka kaphap raq atiichhiikuq wan ngutiika alaq she riibaiqto sham. Raüta apaiq ka ashkongtamli Phungmaiqse miishe jakito. Chenyangro ka atsan tsii kilam chong niishe chap raü. Raüta atsan mong na nyapwaro she sitlo. Kriika ngarai maiqse akongtitiim rai akhek anaq rintii ngatlaq akhing na, kiijaq tsangshiq phong na apaiq ka pong na atrai kai miika ajeasi she miraq. Kriika wepuq we ikhiishe, riimakla nokwe rai pongdam mak ikhiishe, kiijiishe thawe raq apaiq miika kra jangshi laq laq se phaqsigtlaq kra riika apaiq wenyi rilung na jam min bimak nguta mitlin chongkuq. Kiimaq hanngam tiima nai hanngam ramho sükhatsi thun riishe atsan mong na michongkuq. Krai mren


apaiq ka akongtibi rai ashe seachong beachong tiitsa bomtsi kriishe mipeosiq. Kiimaq khuhü kheahü sumla thun kra liisea she mipolosiq. Kiimaq kongti abi atiti rai haisea kriishe mipolosiq. Maiq wiinumtlaq khok na liikai, abi mangjong hiq wa polosea kiimung thun kriishe millomdam. Kiimaq ngarai kaq tiishon jon bomtsi kriishe atsan mong na ngarai tiima kriishe miphaho. Raüta maiqse ngojai na jangshise ngarai klo ka ajiq ka riimak na nguta thawe raq tiishontlaq kra bomtsi kriishe atsan mong na mitiima siqho. Tengto, nashiq raq abi wushikong thun ka kiimaq abi tiima thun ka nashiq khupo thaq maq biwan raü ka tangta lot mai. Shatmaq nashiq raq tsangshiq ma nashiq rilung arshe tiijamsha hai jiika, nashiq ka ajiq ma mijaki rong i. Laita tsangshiq ma nashiq tsan mong na achü she tiikai hai jiika, laita abi jaqsham ka atai ase she tiitho hai jiika, nashiq ka ashut she miraq. Nashiq raq abiwe ma nashiq jaqshise kra kuqhai jiila, apaiq raq nashiq jaq kriishe mirangho. Raüta tsaiji nai wenyi ka pattup pat-sa wamungtan niishe mitiidea hit phaquo. Kra ningkhan Shiikeawe raq atsan tiitsi raüta, nashiq ma tsii chongtlo. Jero rilung hanngam ramho kriiwa ahin na juchang kiimaq ngarai rai ka tiitsa maimak nguta chongtlo. Kra ngarai ka

jamkhii lam lu miili waraü min, ahang riibaiq chang. Jesuq phana jutlo laq. Apaiq ka ümnaq tiiwongketi kiimaq ümnaq tiichhiiketiwe.

Ara sumla na maiq weshi raq maiqtsan ka jasai maq shuktlo. Kra kata Phungmaiqse shummiiti kiimaq Phung lam ningtangti. Tsangshiq raq arot bomtsi maq kiimaq shummi nübok maq Phungmaiqse tsan ka jasai maq shuktlo. Raüta Phungmaiqse tsan ka tiimitlo. Akha riitlaq arka tsan nai maq siti Phungmaiqse raq ninlot mak. Kiimaq tanglot mak. Apaiq raq maiqse ma haisong ka apako she miraq. Jamkhano ngukla maiq raq jamlai wa mingü kiimaq maiq raq jamlai wa miraq kriima haika apa she miraq. Raüta apaiq ka maiqdiwe miishe mijaki. Raüta Shiikeawe wokhong wa alu niishe mikiho. Akhing ariq nai abat abu kriishe litkot chamchao akhing riihumtek na misi wan kiimaq tsaiji tran wanko lische miraq. Kriithun ka atsan mong niishe mishang wan. Paü sumla abi pinthum ransu ranchang tsantsii kriishe, nanok ka phanrap na ong wan kra chhi raüla, kiimaq chithe ma jawan kra chhi raüla, atsan mong na apaiq raq tho ka hemak shon niilische mishang wan. Kiimaq kriima akhing la kuq raüla, makshu rashe nai shiikong tsii ma kilü kiishe midikuq wan.

Nashiq raq Tati Jesuq raq kamlam bomtshi chongkuqtlaq kra lang wan mai raüla, nashiq tsan mong na kampho ma sükha tsii ka shang wan ka jeriiq riiq li miraq. Jesuq raq akha ngutlo, "Namsam ka honkamshat nai achu jaüshat maq kherong liijo. Maitai ma tiitang jiiq" (Mot 26:41). "Ümriiti riiwa maiqmii kamasham na pharangrang maq sitiikang nguta tiima tlaq, kriiti riiwe ka pinthum honkam shatmaq misi laq" (1 Ko 10:12). Nashiq ka Shiikeawe raq akuq rekhat chang miirii ka wiita kunkun maq tiimiikhiiq laita sirong i. Kra riihaitiq thawe raq abi kiimung chuntsi tiiwatlaq kra mito wanlot rong i (Eph 6:11-18).

7. ACHHAN WAN TSANTSII RIIMAKLA WANSHAKSHAK



Ara sumla niika maiq kamasham na achhan riiwan tlaq kra tiichhitlo. Apaiq ka akhing ashi na Shiikeawe rawü na sito kiimaq ramungtan wa

akuq kongphiq sum kra teito. Kiimaq apaiq rii Asü Wenyi akuq kriimin lapto. Shatmaq apaiq raq apaiq kamtsantsii ka thaqbaiqto (Hib 6:4). Kiimaq kra sumla riika maiq juwa jangshi ra dongdii min apaiq ngarai tiidii mak riimakla arilung ka Shiikeawe ma kiinong kuqmak dea, apaiq ma, "Tsütsa Ahea" bomtsi kra apaiq ma chongkeje kiimaq tiichhikeje taü maq dongdii min, Tsütsa Ahea kra taomakti maiqse tsantsii sumla tiichhikuqto. Maiq ümriitiwa Shiikeawe raq apaiq ma chongkeje taü maq min, atsantsii ka wanshakshak sitlaqti ka naolaq hea riiwan wan, diikiq dea wan wan li miraq. Apaiq ka ümtinkhan shiichaq raü min maiqmii ningkun maq atsantsii ka klai lot mak.

Jesug apaiq rak maiq jai na chhan wan tlaqti kra miitu ka akha nguto, "Ümtiikiiwa abi winji ka maiqkhum wa jobaiq tlaq, kra raüla, kra winji ka, rumnyangkhi na khu akham min ahü, shinram shinriiq binjü na, asi anga chang ritkai kihotlo. Shatmaq, kiijaq apaiq raq asi anga chang hum mak she raüla, 'Ai, ngi arka, man niiwa ngi sichang jamchü ijiili jang wan nong lata misi wa,' nguta apaiq nai apaiq ka mitiingo. Krai mren, apaiq ka sichang chü jam kiina mijang wan nong. Raüta, kra jam ka siirairai hea, rong

awii min chhii rea je she michhi wa. Kiijiishe, apaiq ka kiho nong raüta, apaiq nam ma abi winji miishi kra sheaki raütiishe, kriiwe khum niishe misi wan. Kra jai niishe ka, kriiwe rilung ka kongkhuji na kra nam miimin, naolaq, tiibitaq diikiq tiidearok, achong chang ahü she miraq" (Luk 11:24-26). "Tsangshiq ma mra pin wantaq kriirag taksu bomtsi na chongtlaq ka tengto dea nguta hong wato: 'Hi kaü riika, apha da kra hali mesiq ki nongtlo'. Kiimaq, 'Waq kaü ka kham maq ajii tiheke jai, jangphat boqtham chum na hali bumki nongtlo'" (2 Pe 2:22).

Arthun Siitlaq Bomtsi na chongtlaq arka khangriri hea, maiq kamasham na chhan wantlaq rilung sumla ka tiichhikuqtlo. Riimakla ngarai tiidii mak maiqse tsantsii ka tiichhitlo. Ngarai ka pinthum laopha kiimaq khonglaq. Kriikha maq apaiq ka jangshi ri hali jangwa nong raüta kriiwe tsantsii kra khonhotlo. Rqüta kriiwe tsantsii kra jamshahotlo. Arka apaiq theaphi na atsantsii kra tiichhitlo. Asii Wenyi, tsannin woknin parokaü kriika maiqse tsantsii mong sitlaq kriika, kiiwa ningkun maq ajobaiq ikhiishe jakitlo. Jamkhano ngukla ngarai nai Asii Wenyi ka adam na silot mak. Maiqse tsantsii ka Shiikeawe shomjam miimin kiimaq Soitan tiipaü

sichang miimin ka jalot mak she. Rase Shiikeawe Bomtsi kiimin kai tsanbi taqtaq maq donghotlo. Jai nū na liithüthü, atsan na ran shran maq, apaiq ka riimakla kriinyung raq amo arki maiqse raq ngarai tiidiitaq ikhiidea tiidii haüjaq ahea riichang nguta, raüta atsan mong na, "waqkong dung chang waqtsam cherongtsi kiiwa ashi ra raq siinai ikuq nya, i ramtsi ara atiitsaq ha chang nguta, rangransiqto. Shatmaq, apaiq miika jurmin, aphaq sia chang phan ka kuqphaq mak riito. Atiisup niishe, apaiq tsii ka samto. Raütiishe, apaiq nai apaiq ka akha nguta tiibotto, 'Ngi arka arwa tiido wan lata, i we phana li she mijang wan nong ha. Lata, i we nangnga, i we le, ngi raq Shiikeawe man na nai ümman na, ngarai jonghea tang wankang. Ngi arka ümchaü sanha, ümse nguta ngo ka thek mang she'" (Luk 15:16-20). Awe raq ase ka maiq mang ngamchan kra chhi raüta, apaiq mra ka diikuqto. Kiimaq apaiq ka chojong chise maq taoto.

Ara tsantsii sumla na riikhaqli mra tiidii hakhi ka tiichhimak. Shiikeawe phanü na jang wan mak. Jesuq jichong na jang wan raüta mra tiidii wan miitu manhii mak. Apaiq tsan mong ka jinbu wa na ashu keihea ikha nyaitlo. Raüta atsantsii

ka amaa she kaiqshak shak. Anilok ka asi shatmaq Jesuq raq apaiq ma tiipaiqnea raüta heatlaq kriika taimak she. Amak ka asi shatmaq ajichong na wamungtan asup min sup mak apukaü jonghea kriika chhimak. Apaiq ka angarai na riinyat sea kli ajeasi min ahü she. Soitan raq atsantsii ka wiita ajaqkhon mong na akhonho wishe. Raüta Soitan ka apaiq tsan mong na hokham ikhiishe ngatlo. Ümchaü min apaiq ka maiq mak lii niika maiqshaqwe ashi ikha, shiilang ashi ikha, rakhütsiri niika kamasham maiqse dea nguta tiichhitlo, maiqmaa chiim na maaraükhu ka longnin liitai maq alo lüdiidii ikha, "akii tro thun ka lüdiidii hea. Shatmaq maakho longsha mong niika, maiq ma namtsang, maiqrok maiqrii rong li riiphongtlo" (Mot 23:27).


Tengteng Wenyi ngachang ka arot raüchongwe kaü kriishe ngakito. Ngamse loweatek, ngarai loweatek ka akhek tsak amii thun kiimaq abi winji krii riishe tsan mong ka jiiwan raüta ngawato. Apaiq ka kra kharü mong wa dongkihajaq nguta dantlo. Shatmaq arthun raq apaiq ka tsangshiq kharü mong na shaqtlo. "Mosheq raq akuq thü Thungtri jinti, ashut we kha ka apho riikuq tlo. Khapho ranaiq hakhibi wenai nai wetsam raq lo, kiimaq apa lin riilo,

chap raüta, apaiq ka shutto dea nguta hakhi she kuq raüla, apaiq ka tiihang mak she, miisaq tiithum tlii kha tan tlo. Ikhiijiika, Shiikeawe Se ka ji maq nishishi raüta saisi tlaq, kriiti ma kiiha? Shiikeawe tongshong khamchong ram chang tiijai kok, apaiq maiqmii ngarai khum ka tiisii he chang tiijai ka, apii ashi min ngu mak, shishe tlaq, kriiti ma kiiha? Tiima rong liita, akhnok maiqse miika, Shiikeawe raq ümtinkhan heng mo tiihoke chang she wa miraq!" (Hib 10:28-29; 2 Pe 2:1-14).

Riita ara sumla arka ümtsantsii krai sha mren damtla? Lungwii phunowe lei, Shiikeawe man na hoqlaq, naq tiihitkiq she. Ümtsan mong maq atsi maq, hoqlaq, "Apaiq ka pattup pat-sa atrali she sitiwe. Kriikha maq, ümchaü sanha, maiqse angu ümchuwa Shiikeawe wokhong na, Jesuq mang chong raüta wawan tlaqti thun kra, apaiq raq tiichhiikuq wan ruq lishe miraq" (Hib 7:25). Kiimaq apaiq ka milot kiimaq raq rowtlo kiimaq ngarai thun wiita diike miitu lugwiitlo. Ümniika ümtsantsii riikhaqli klai wan laüta mra tiidii wan haüla, midiikuq. Apaiq raq thawe ka miningtanglot kiimaq shotsai winji kong thun kra mitolot. Raüta tsangshiq thun ka ümtsan mong wa wiita mijobaiqlot. Kiitiina ümniiraq Apaiq ma

kriithun ka tijobaiq miitu chochikhiq riichang. Rampuntsitiwe Jesuq phana wataq we ikha, Apaiq phana walaq. Raüta akha nguto, "Ümniiraq mangchan haü jiila, ikhum ara mitiisii kuqlot haü." Jesuq raq mangchan tsihea lam maq atsitiwe dü na ajaq maq sham raüta, "Ngi raq ümkhum ka tiisiike rowtiikang. Ümchaü min heakikiqshe," nguta bomdamto (Mak 1:40-41). Shatmaq ümniika wanshakshak ngarai niili sihaüla, kiimaq rawulam ka rowmaü ranyaq lam kli phan raüla, ümniika aran phan chang lam lu ka ahü she. Akhrum kiimin ahü she. Jamkhano ngukla ümniiraq tsailam kriili phantlaü, rilung lam ka rit maü. "Ngarai raq apaiq jaq maq kuqtlo - kriika tsailam" (Rom 6:23).

8. NGARAI MAIQSE KHAPHO



Arjaq nashiq raq chhitiikai atsantsii
wanshakshak ngarai maiqse jurwa Khristo
jaiphan wan ma rahiq ka jai na hit wan ruq maq
siti ka apaiq tsai wan lam kriili she mirhum.

Akhum ka atsi asi lishe kiimaq atsaiji ka atsai ma ahaisihea miraq. Amaa (ariirong) ka tiihanghiiq miili misaüwa, kiimaq tiimara mak bala na misaüwa. Arot ngarai peolam phan ka amoshe mirki. Kiimaq ngarai jaqsham thii ka phiippsi chang athii tsinhea kra akhing kriishe apaiq kharii na misaü wa. Apaiq raq wamungtan na khiim wan chamchao kriishe misap wan. Ümchaü apaiq raq achu jaü rowtlo, raüta Shiikeawe rai riibom rowtlo. Shatmaq apaiq raq Shiikeawe lungwiitsii ka rahiq luhea she shipog wanto. Kriikha na Shiikeawe rai riibom lot mak she miraq. Akongti thun ka apaiq changdü tho na chap miimin ahai she miraq. Kiimaq tangshiq raq shaqmii tsaijido bom chongkuqtlag kra thun riika apaiq ma ümchaü khrum lap chang ka ahü she miraq. Apaiq chithe riimin arilung ka tlu kuqлот mak she. Kiimaq apaiq wenyi rilung kriimin tiichhiilot mak she. Kiimaq apaiq chamchao tsiisi kriimin tiitsaq kuq lot mak she miraq. Apaiq raq Shiikeawe miitu tiima tsantsii ka kuqлот mak she. Jamkhano ngukla thawe raq apaiq ma kra akhing ka kuqmak she.

Apaiq raq akhing ashi na lungwiitaq kiimaq kriithun miitu arilung ka siwantaq thun wiita raq ümchaü ka apaiq slailiiti siisag she jawanto.

Apaiq ma akamsea chang tiichhiihü shrawe kriimin, shrawe riimakla noqku liiti maiqlawe riimin apaiq ka khрум kuqлот mak she miraq. Jamkhano ngukla apaiq raq Shiikeawe mangchan ka shipoq baiq wanto. Kiimaq apaiq kha ka ümchaü Shiikeawe raq apho she riitlo. Apaiq raq ümchaü shetiқ, "Riita, arthun ara ningkhan, atra Shiikeawe jaqkhon mong na dea wa ngutlaq kriika, pinthum haisi chang!" (Hib 10:31) nguta Asii Bomtsi na chongtlaq kra saptlo. Apaiq raq apaiq ma akhing amiinunu ranaiq niitiq arilung ka Shiikeawe ma mikuqha nguta tiihit khesiq wanto. Riimakla apaiq atsai wan she akhing na changdü niitiq mikiinong kuqha nguta tlin phin wanto. Shatmaq apaiq raq arka aleawa wishe nguta saptlo. Maiqse pahea ahing amun ka akha tiihanghiiq miili tsaikitlo. Tsangshiq ka atsai wan she changdü maq Shiikeawe ma khum kiinongke akhing ka lap mak she riitlo. Arningkhan Shiikeawe puk na nyap wan ka Apaiq ka aje na sitlaq bala akhek nyap wan raatlo. Ümchaü ka apaiq raq Shiikeawe raq chongtlaq tsaidojido bomtsi kiimaq tiichhiiwan bomtsi kra tai rii na, ara atsai wan ngarai maiqse raq, apaiq raq arilung na apaiq ma mra diike bomtsi kiimaq lungwii bomtsi chongkuqtaq kra shipoq baiq wantaq kra ningkhan, Chhiitiwe apaiq raq

shipoq wantaq we bom ka arshe mitai, "Namshiq ka Shiikeawe manson hotibi ara ngi tho arwa tiibin tlo ronglaq! Khiim wantlo ronglaq Thawe nai apaiq rasetiim miitu atiihong pattup pat-sa thumki mak phan wamungtan mong kiijaq!" (Mot 25:41). "Maiqse angu ka, khumtek lakshi ka atsai chang dongdii. Kra jai miitiq, Shiikeawe raq apaiq kha ka mipho kuq" (Hib 9:27).

Copyright ANGP

akhing na, apaiq ka tiimemak, kiimaq atiisup na saüli nintlaq, raüta Jesuq Khristo lümaq sreajong ikha tang wan ruq tang wanto. Apaiq ka Phungmaiqse rilung aju riilong kiijaq lomdamtlo, kiimaq apaiq ka juruqli riilong wantlo. Atsan na pharang rang maq shiikut raüta ningkun shoq wiishoq jutlo. "Lo ta, namjaq namji ka naq tiibakbat rongkiq she. Atiihong rii lanta si rong laq. Nam lakü ninrai tlaq kriika, atiihong she rii chang! Nam lakü ka naq tiidandok rongkiq she. Ningkun ka shoq wiishoq lanta, shiichaq rong laq" (Hib 12:1,2) Asii Bomtsi na chongtlo.

Soitan raq asengi shotsai winjikong rai kamasham na sitiwe tsantsii ka trotam maq komwanto. Tsangshiq raq kra Shiikeawe se ka lamjiq nü na laho miitu shiikutto. Shiikong tsii, kampho lungwiitsii, sethoq sepii jasha, kiimaq ahin thun pahea ngarai maq arjaq tiichhitlaq kriimaq maitai wanto. Chiqwaiq kaü rii na, nashiq raq ümchaü ka kumtoq kaü chhitiikai. Jamkhano ngukla ngarai ka jangshi shi akhing na laihin ma ja raüta watlo. Raüta atiipaü riitlo. Riimakla apaiq mang ka pong tiichong raüta watlo. Shatmaq Phungmaiqse ümriitiwa honkamshat sitlaq, kriiti riika kamasham

lamphan chong raüta saüwa raü min apaiq riika asap. Riimakla rawulam rase ikha ja raüta watlo. Jamkhano ngukla Shiikeawe Bomtsi nai Asii Wenyi raq apaiq ka shunsheatlo. Maiq weshi, ajaq na chekok ka do raüta, Phungmaiqse phong na miwiinum siqtlo. Raüta apaiq ka arot mangjong hiq wa hanngam polo lam na laoho miitu mishiichaq. Shatmaq rilung kiinong kuq raüta siti Phungmaiqse miika kra riika jam min taimak she. Jamkhano ngukla apaiq raq hanngam mangjong hiq polo ramho thun ka kunli Khristo rai pumsongkham na atübaiq kun she. Kiimaq ara sumla na maiq wenai ngojawe kra riika Phungmaiqse ka jasai maq shuktlo. Shummii laqpii, achongsea, aslai liisea, kiimaq thatsang maiqse lümaq shiikeng leng siqtlo. Kiimaq rakhütsiri na Phungmaiqse nguta tiingotlaq kriiti raq apaiq ka jasai maq kra riikhaqli kamasham sitiwe tsan mong na shuktlo. Shatmaq nanok raq jamlai wa ngutlaq kriika taimak. Kiimaq Shiikeawe raq jamlai wa chongtlaq kriili atsi dada maq taitlo. Apaiq raq Jesuq bomtsi, "Namshiq ka isenginok ngo kha maq, maiqse raq namshiq ka shummi raüla, kiimaq tiichamchao raüla, kiimaq namshiq khuthaq phanrap phanrii abi arot akiq nyan raüla, chochi ronglaq. Namshiq ka khoqriiq

shishiiq miili sironglaq. Jamkhano ngukla namshiq miitu ramungtan na poksi jonghea thütlo” (Mot 5:11-12) nguta Asii Bomtsi na chongtlaq kra langtlo.

Nashiq ngarai hanngam phara raq nai thawe raq Phungmaiqse ka thaqmak. Phan phan maq Shiikeawe lungwii wokhong mong wa pong na sheaho tantlo. Shatmaq apaiq raq chojong chise kiimaq kamto maq riikhaqli ngutlo, “Riita, ara chongtiikai, Khristo mangchan wokhong mong wa, nashiq ka jurwa mitriiphea wan lot? Nashiq ka chamchao ranaiq akhing riilo, alit akot riilo, maiq raq ngeng seng wan tlaq kra riilo, song aram tsi riilo, miitsan miijan riilo, haisi rasong riilo, kiimaq tsaimiq khusiq saü wan ranaiq riilo, nashiq ka Khristo mangchan wokhong mong wa mitiitsü ngii lot sha?” (Rom 8:35). “Riimak, arthun chongtiikai chamchao litkot wa nai kham arthun arka, nashiq raq, nashiq mangchan wanti we lümaq, kunkun atang wan kun she!” (Rom 8:37). Riita apaiq raq Shiikeawe raq akuq rekhat chang miirii thun kra sam raüta, apaiq raq thawe raq apaiq longtlaq thun kra mitow wanlot. Kiimaq ümtiikiiwa rahiq abi ranaiq saütlaq kiimaq raüta atiisup na saüli riikhat wantlaq, raüta Jesuq Khristo jurwa phanrap

phanrii maitai thun tang wantaq, kriiwe lümaq ajini chang ba ka tiime mak chaptlaq, kra laita nashiq raq apaiq pum lümaq rekhat ka mitang wan rong i, laita achhai anyii hokham khuphok ümtiikiimin maqki mak phan kra nashiq raq milap wan rong i (Eph 6:10-18; 1 Pe 5:4).

1. RAIQSAIQPOSE sumla arka apaiq tsantsii (conscience) kra tiichhitlo. Apaiq tsantsii ka khangriri hea kiimaq wüjangjang hea. Atsan mong niika kantsantsii alum alei, kiimaq Asii Wenyi raq ama asho awo sitlo. Rase, kriika Shiikeawe Bomtsi. Kriika apaiq ma tiidongkiki maq rekhat ka atiisup na saüli tang wan tlaqti ma achu shiiman ümchuwa kuqtlag kra chongkuqtlag. "Jurwa ara rekhat ara tang wan tlaq, kriiti sreabi ma, ngi raq Shiikeawe sonruk mong na rilung petsi chong sitlaq kiiwa atsi pansea miitu arang mikuq ha." "Jurwa rekhat tang tlaq, kriiti ka thongnai tsai raq tiichamchao mak she miraq." "Rekhat tang wanti ma, ngi raq apaü raüta athü mana kiiwa wiijam mikuq ha. Kiimaq hali, ngi raq tsangshiq loweatek ma longpo lüdiidii poshi mikuq ha. Kra longpo na mang anye tiiwaiq shat miraq. Kra mang ka, kra lap tlaqti ka tlea raüta, maiq ahinti jurmin sap mak miraq." "Jurwa rekhat

tang wan ruq maq shiichaq tlaq, kiimaq ngi raq athithi na atiisup na saüli jaqsham tlaq, kriiti ma ngi raq, mangjong hiq na maiqmung ümchuwa sitlaq kra hupkhang wan miitu arang mikuq ha.” “Jurwa rekhat tang tlaq, kriiti ma ara khealü miirii ara mitiitsam kuq. Kiimaq ngi raq tsangshiq mang ka atrati mang lakdap wa lambaiq mang mirha. I we man na kiimaq apaiq rasetiim man na, ngi raq kholam kholiq tsangshiq ka i sengi lü nguta rairai riirii she mirairii wan ha.” “Rekhat tangti, srea jati we ka ngi raq, i Shiikeawe shomjam na khamlawe ma mitiija ha. Kiimaq apaiq ka kiiwa, ahin na kimak she miraq.” “Jurwa rekhat tangtlaq, kriiti ka ngi hokham ngacho tho na nga dam miitu ngi raq arang mikuqha, ngi raq rekhat rang lata, srea ma jawankang krai mren, ümchaü i We hokham ngacho tiinap na nga tiikang. Kiikhiisii kriiti kiimin ngi tiinap na i hokham ngacho na mitiinga ha (Atii 2:7,11,17,26: 3:5,12,21).

2. LINJE KAMPHO KHIIQ sumla kra riika atsantsii lamlam li min riimak, apaiq kampho kiimin Shiikeawe ma akiinongke kun she kra tiichhitlo. Akampho ka atu na shaphaq baiq la na, apaiq raq miitsan maiqse kra khrumtlo.

Apaiq raq aroqkhu wa kra kuq raüta (apaiq raq laptlaq piikii wa aroq khu wa kuqtlag kra) kiimaq honglu thun kuqtlag kra, riimakla ajaq na ümchuwa sitlaq kra, Shiikeawe ma kuqtlo, wiita ka Shiikeawe khushü tiijong miituli kuqtlo.

3. WINSII PHU NAI NGIQ SUMLA kra raq apaiq ka asii kiimaq stiq skhaq rilung sitlo nguta tiichhitlo. Apaiq raq arilung ka chechok tsampii ma jaraüta tiibibaiq mak. Riimakla ashe ashi phaqsiiq raüta akhum ka tiithenjen baiq mak (Kiim 15:20). Apaiq raq akampho ka atu na tiiwiihiimak phan. Kiimaq apaiq raq akhum kiimin tiithen baiq mak (kriika Shiikea shomjam), ngi shup nyang raüta riimakla pin phaqsiiq raüta, kiimaq apaiq raq tsiq awii phaqsiiq raüta, riimakla khum then chang tsiq phaqsiiq raüta, akhum ka tiithen mak. Shatmaq phaqsiiq asea ahea awa phan, asii phan, han hea chang phan kli phaqsiiqtlo. Apaiq tsan mong ka achu jaü chang jam miishe jakito. Kiimaq apaiq ka noqku na akhingtek kitlo. Kiimaq kai shreng raüta kitlo. Rahiq ka rahea riitlo, rabi riitlo, noqku na kiruq phan. Kiimaq jamkhii ranaiq li jiimin kiruq kitlo. Apaiq raq achu jaü lungwiitlo, noqku na jiimin kiimaq ajamkun maq ajamti rai jiimin. Riimakla apaiq khok na jiimin. Jamkhano ngukla apaiq raq

asap Phungmaiqse ka Shiikeawe rai riibomhü maq jonglu wan lot mak.

4. LINJE LAKDAP sumla riika Asii Lakdap ka apaiq miitu linje nguta chongtlo. Kiimaq apaiq raq wranaiqtek phattlo, raüta siditlo. Raüta taksu tsii humtlo. Kiimaq ningkhun laptlo. Rilung kiimaq rawüli humtlo, kiimaq kra mong na awea lot mai tsiiq chong nyam chong humtlo. Kriika apaiq shunsheati piijongteng miishe jatlo. Kiimaq thawe khat raüta tang chang nepja ma jatlo. Arka apaiq wenyi miitu ranaiqtek dungjada she. Kiimaq akham nyangtsi kra tiitsaq miitu kham khap. Kiimaq akhum tiisihe chang khamrai kiimaq apaiq shamtlii chang chamni.

Apaiq raq apaiq pumsongkham kra chochikhiq maq pitlo. Jamkhano ngukla apaiq raq pumsongkham pihü miika poksi lap chang min ahü. Apaiq raq apaiq Khristo rai she amaa wa dong wan kang she nguta asap. Kriika arilung anye kra siwan miitu, krai mren atsan tsii ka ramungtan na sitlaq hupsam thun kra tiima raütli apaiq ka sitlo. Kiimaq atsantsii ka ramungtan na sitlaq hupsam thun kra thaq na tiitsi raüta sitlo. Krai mren, ara mangjong hiq na sitlaq hupsam thun kra miitu ka atsantsii ka

thümak she (Kol 3:1-2). Apaiq ka Shiikeawe rai riihum wa miitu khekham maq sitlo. Raüta apaiq ka pechong ashi khamraise kii na chamtlaq ikha sitlo. Raüta atsi ango thun ka akhing khaq khaq na tsikuqtlo (Sho 1:3). Raüta chiisan spiq raü kü ikha atsi ango pahea tsingotlo. Apaiq ka atsai kai ma haimak she. Jamkhano ngukla, apaiq raq Shiikeawe minhap lungwiitsii ka Asii Wenyi lümaq alapwi she. Kra minhap lungwii tsii raq atsan mong ka asho awo atiima kun she sitlo.

Copyright ANGP

10. JAM NA WAWAN ACHHAI ANYII



Jesuq raq nguto, "Ngi ahata amaa wa dong wan ningkun tu kiimaq rilung tsitsü raü chong. Jurwa ngi ma kamtlaq, kriiti ka atsai jai min atrali she misi. Kiimaq juwa atra sitlaq, kiimaq ngi ma

kam tlaq, kriiti ka ümtiikiimin tsai mak she miraq" (Jhn 11:25-26). "Jurwa i bom chong ara tai tlaq kiimaq ngi tiikaiti we ma kam tlaq, kriiti raq pattup pat-sa rilung ka alap wan wishe. Kriiti kha ka apho chang ahü she. Amaa wa atra she" (Jhn 5:24). Phungmaiqse miitu atsai miika ahai chang min ahü she riimakl mo mitiiho nguta hai chang min ahü she. "Atsai ningkun ka shiithen baiqto she; rekhat ka kunli she tangto! O, Atsai ningkun lei, ümjo tang laü? O, Atsai ningkun tu lei, ümlaipo maiq ngiq chang ningkun ka ümbano?... Shiikeawe ma kechutum rong i, apaiq raq nashiq ma arthun ara tang wan ningkun nashiq Tatiwe Jesuq Khristo pum lümaq kuqtlo!" (1 Ko 15:54-57).

Maiq juwa Shiikeawe rai adam maq siwantaq kiimaq kongshi kiimshi maq siwantaq kriiti ka atsaikai miitu haimak she. Apaiq ma atsaikai akhing she saü raüla, apaiq ka chojong chise maq miwa wan. Arka Kiimwe Paul raq chongtlaq akha miraq, "Ngi raq kla, ara han-ngam rilung arka baiqthü lata wawan ro tiikang. Lata, Khristo rai siwan ro tiikang. Kra riiwe ka ngi ma pinthum ahea" (Php 1:23). Phungmaiqse ashi riika Jesuq theaphi kra chili she lungwiitlo. Apaiq miitu tsaitiwe kiimaq apaiq ngarai kha

dokke miitu pumsongkham na tsaitiwe kra sham riichhiro lungwiitlo. Asii Wenyi riimin apaiq ma Jesuq bomtsi na akha chongtlaq kra bliiq chongkuq nongtlo, "Namshiq ka naq chapa rongkiq, kiimaq naq tiimangchan rongkiq.

Shiikeawe miili kam ronglaq. Kiimaq ngi miimin kam ronglaq. I We jam na asi chang tap ka pahea asi... ngi ka namshiq phana kinong lata hali, namshiq ka i phana misheaki nong ha. Krai mren, namshiq ka ngi rai adam niishe misi wan han" (Jhn 14:1-4). "Maiqse angu wa jurmin jangshi ra min, akha mihong tha wan nguta tiima chhi tai lot mak. Kra riiwe ka Shiikeawe raq apaiq lungwiitibi ümchuwa sitlaq, kriiti miitu tiije kuqto she." (1 Ko 2:9). Kra ramungtan na chela ashi achhai anyii Tati Jesuq jai phan phan ara mungkang maq siwanti kra miitu chela ashi tiijetlaq kra peohea sitlaq kra chongchang bomtsi ka ara mungkang hiq maiq bomtsi ahü hum mai she.

Kra maiqphiip atsi maiq rii rong (amaa riirong) kra la na, arma kongkhu na sumla na rase riimakla Shiikeawe kiimwe asi chhitiikai. Apaiq ka kra maiqwe asii tsaiji kra Shiikeawe phana

hali shea wan nong miitu khetlo. Tsaiji nai wenyi ka ara ariimkai chang hanngam khum kharü mong wa wase miishe tiidong wantlo. Raüta ramungtan na kilü thun dije kriimaq rana Jesuq phana, apaiq lungwiitiwe kiimaq apaiq miitu pumsongkham na tsaitiwe phana mishea wan. Chochi jonghea khoqriiq shishiiq maq apaiq ka Shiikeawe man na, apaiq Tatiwe kiimaq Atijongwe raq akha shomra raüta mitao wan, "Riikhaqli, ong laü. Ümniika maiqshaq ashi. Kiimaq tsapsaü kapse jaqshi se! ... Wara, ümchaü min, ümniika ngi rai chojong chise maq poi arshe lom dam laq!" (Mot 25:21). Soitan raq apaiq khuthaq na arang homak she, ahü, jamsha lot mak she. Jamkhano ngukla, "Ranaiqshi kra miitsan we ka tsaikito. Raüta, rasetiim raq apaiq ka ramungtan na shea wanto. Raüta, Abraham ma jaqtsi nü niishe tiinga wanto" (Luk 16:22). "Kiijiishe ngi raq ramungtan wa maiq bom ashi hali akha chongto taikang, 'Ara waiqlaq! Kechu jonghea ümriiti wa ümchaü ara miiphat she, Tatiwe lamphan na tsai tlaq! Ngohea dea tengto!' nguta Asii Wenyi raq treto. 'Tsangshiq ka Shiikeawe jaqsham pinthum hun nü wanto. Ümchaü sanha, tsangshiq ka hunhü niihü miishe mitiisi nga'" (Atii 14:13).

ATIISUP HONLAM BOMCHONG

Lungwii phunaino nyinaino, ara lakdap ara phatti lei, Shiikeawe raq ümtsantsii ka ümnaq lungwiitiwe apaiq ma kiinong ke wan miitutiq mikhrum kuqlaq. Jamkhano ngukla Apaiq ka ümchaü ümniirai akha riibomdamtlo, "Namshiq nai namsaü namsetiim ka Tatiwe wokhong na hali nyap wan nong hanla" (Tri 30:2). Jesuq ma ümtsantsii anii makaiq sitlaq kra, tsiim jüshushu, ümtsan mong na tsihea akhiim tsitlaq kra, apaiq ma kuqlaq. Raüla Apaiq raq ümniima tsantsii anye kiimaq khutsai anye she mikuq. Ümtsantsii laopha pinthum kriima ümnika naq tlaö phaqqiq. Riimakla apaiq raq jamlai wa lungwiitlaq kra lam thun ka naq phankiq. Jamkhano ngukla, "Maiqse tsan mong na abi tiima dongtlaq kriiraq apaiq ka sethoq ja lam na sheahotlo..." (Mak 7:21). Ümngarai phong ka miimthü laq. Laüta jamlai wa tengteng kriijaq riiwiiq laq. Jamkhano ngukla, "Ngarai tang wanti riika, atsai lam humtlo. Shatmaq, Shiikeawe riika maiqse ma, nashiq Tati Khristo Jesuq lümaq phemaq, pattup pat-sa rilung kuqtlo" (Rom 6:23).

Kiimaq ümniiraq ümrilung ka Shiikeawe ma kiinong kuq wan laü she jiila, "Shrawe ashi raq

nanok ma tengtlaq bomtsi ka jamkha trahoke chang wa, kiimaq jamkha shrinke chang wa, kra jaqsham ka ngi raq ümniima tlang kuq kang she. Ümniiriika i jaqtho lap laü she. Kra kha maq, kra phanphan sham wan lili riilaq. Jesuq Khristo pum lümaq tengteng kamtsantsii, nashiq ma kuqtaq, kiimaq lungwii tsantsii kuqtaq kra arang samhea tiipha laüta tiicham laq" (2 Ti 1:13). Ara ningkhan na sii hali Paul raq 2 Ti 1:12 na waiq nongto, "Jamkhano ngukla, ngi raq ju miiwa kamtsantsii thü tiikang, kriiwe ka, ngi raq asapha. Kiimaq ngi raq asapha, apaiq ningkun ajong maq, ara tsütsa ahea armin, Phangthum Ranaiq na saüli, chiisan taqtaq li mithü." Shiikeawe ma ümkamtsantsii ümkhum na sitlaq kra tiijong lu wan laq. Asii Wenyi ningkun maq achu jaülili riilaq. Ümkhum ka Shiikeawe lungwii wokhong na thülaq. Ümmak lii ka Jesuq theaphi na liishat maq thülaq. Apaiq kli lam, Apaiq kli tengteng, kiimaq Apaiq kli rilung. Nashiq Tatiwe, Apaiq ka asetiiim sheakai jaqloli mijangkinong. Apaiq ka hokham thaq Hokham, kiimaq Tati thaq na Tatiwe" (1 Ti 6:15).

"Namshiq ka tiichhan mak maq tiiwongketiwe, kiimaq namshiq ka shutphit ahü siirairai maq Apaiq khushü ngao chhainyii mong na shea

wantiwe, kiimaq chojong chise maq kiijaq mantut na tiichap wantiwe, Apaiqli nashiq Shiikeawe kiimaq nashiq Chhiitiwe kriimiili, nashiq Tati Jesuq Khristo lümaq, khushü, jonglu, ningkun, kiimaq arang ka, man na pat achat tlotli wa, kiimaq ümchaü min, kiimaq jai na wattlaq pattup pat-sa kiiwa wiita apaiq riili she mirlaq! Amen" (Jud 24-25).

Copyright ANGP

A SPECIAL WORD FROM ANGP
UN MONDE SPÉCIAL DE L'ANGP
UMA PALAVRA ESPECIAL DA ANGP

This booklet "The Heart of Man" is available in over 538 languages and dialects spoken throughout the world (Africa, Asia, The Far East, South America, Europe, etc.) Our Heart Book is now also available on cell phones, tablets, etc from www.angp-hb.co.za or as an APP "Heart of Man" on Android phones.

Le livre du "Coeur de l'homme" peut être obtenu en plus de 538 langues et dialectes parlés dans le monde entier, à savoir: Afrique, Amérique, Asie, Extrême Orient, Europe. Notre Livre du Coeur est maintenant aussi disponible sur votre Téléphone cellulaire, tablettes, etc. de www.angp-hb.co.za ou comme une Application "Heart of Man" sur téléphones Android.

Este livro "O Coracao do Homem" é obtido em mais de 538 linguas e dialectos falados em todo o mundo, a saber: (Africa, Asia, America do Sul, Extremo Oriente, Europa, etc). O nosso Livro O Coração do Homem também está agora disponível em telefone celular, tablets, etc. de www.angp-hb.co.za ou como um aplicativo "Heart of Man" nos telefones celulares Android.



The 10 heart pictures contained in this booklet are also available in the form of large coloured picture charts (86 x 61cm) bound together in a set of 10 pictures. These "Heart Charts" can be obtained with European or African features and are particularly suitable to be used in conjunction with the Heart Book for class-teaching, open air evangelization etc. Kindly contact us to ascertain the latest subsidized price of this chart.

Les 10 images du coeur qui figurent dans ce livre peuvent être obtenues en tableaux de couleur, format 86 x 61 cm, avec des physionomies européennes ou africaines. Ils peuvent être utilisés en même temps que le livre du coeur pour des classes bibliques, à l'école du dimanche ou lors de réunions de plein air. Soyez aimable de nous contacter pour assurer les derniers prix en cours du tableau.

As 10 imagens do coração, contidas neste livro podem ser obtidas num conjunto de 10 imagens em colorido no tamanho de (86 x 61 cm). Estes "Cartazes do Coração podem ser obtidos com características Europeias e Africanas e podem ser usados em conjunção com o mesmo livro em classes de ensino bíblico, evangelização ou ao ar livre. Agradecemos que nos contacte-se para confirmação do último preço dos cartazes.



Kindly write to us if you are able to assist us with further translations of our free Gospel literature, informing us of the language into which you could translate this Gospel literature. Your assistance would be appreciated.

If you have found salvation in Christ, or have been otherwise blessed through our Gospel literature, please let us know. We would like to thank God with you, and remember you further in our prayers.

Nous vous invitons a nous contacter pour faire des arrangements concernant de nouvelles traductions de notre littérature, nous informant de la langue dans laquelle vous pouvez traduire cette littérature évangélique. Votre aide sera beaucoup appréciée.

Si vous avez trouvé le salut en Christ ou si vous avez été béni par notre littérature, nous vous prions de nous le faire savoir. Nous aimerions remercier Dieu avec vous et prier pour vous.

Nos vos convidamos a nos contactar, afim de fazer qualquer arranjo concernente a novas traduções de nossa literatura em outras línguas. Vossa assistência será muito apreciável.

Se tem encontrado a salvação em Cristo, ou se tem sido abençoado por intermédio da nossa literatura evangélica, faça o favor de nos informar. Pois nos gostaríamos de agradecer a Deus juntamente convosco, e lembrá-lo sempre em nossas orações.

For free Gospel literature, books and tracts in over 538 languages, write to:

Pour obtenir gratuitement de la littérature evangelique, des livres et des traites en plus de 538 langues, ecrivez a:

Para obter gratuftamente a literatura evangelica, livros e folhetos em mais de 538 lnguas diferentes escreva para:

www.angp-hb.co.za

info@angp.co.za

ALL NATIONS GOSPEL PUBLISHERS

P.O. Box 2191

PRETORIA

0001

R.S.A.

A Gospel Literature Mission financed by donations

Une Mission de littérature evangelique financee de dons

Missao de literatura Evangelica financiada por donativos

(Reg. No. 1961/001798/08)

The “HEART OF MAN” books can be viewed and downloaded using the following link:

www.angp-hb.co.za